

M331: Hessische Reimpredigten

12a,1 doma- prima adue-tus
 12a,2 Cvm appropinquassent iherosol'
 12a,3 HEr vf die glose sagit vil
 12a,4 des ich vch nvo bescheiden wil
 12a,5 obe ich iz kan eyn michil deil
 12a,6 gibit mir got siner gnaden heil
 12a,7 // nvo sal eyn ieglich mensche gyt
 12a,8 bedrahten lazen sinen mvt
 12a,9 wie vnser lieber h're quam
 12a,10 zvo deme ersten von Bethaniam
 12a,11 //// Sa prvbe auch zvo der anderen zit
 12a,12 daz zvo der einen siten wit
 12a,13 des bergis da von olivet
 12a,14 bethphage die stat zvo stet
 12a,15 // auch prvbe an deme dritten
 12a,16 wie Jesus quam geriden
 12a,17 der eren kvonig eine
 12a,18 vf eyneme esele kleyne
 12a,19 //// Sa zvo deme vierden male
 12a,20 Salt dvo daz pruben wale
 12a,21 wie krist daz osterliche lam
 12a,22 qvam zvo iherosolimam
 12a,23 // des funften malis prvbe
 12a,24 In dime herzen vbe
 12a,25 wie wole krist enphangen wart
 12a,26 an der vil lobelichen vart
 12a,27 da ieme engeine giengen
 12a,28 die ivden kint in enphiengen
 12a,29 an deme selben gange
 12a,30 Mit lobe vnde mit gesange
 12a,31 //// vil lieben kinder waz hie bi
 12a,32 vns allen nvo bedudit si
 12a,33 bi den funf stucken vor genant
 12a,34 des sagen ich vch ein deil zvohant
 12a,35 // Bethania si vch geseit
 12a,36 eyn hvs der gehorsamekeit
 12a,37 bedudit ist zvo aller zit
 12a,38 da vone sante paulus quit

12a,39 “Fvr vns der ware h’re krist
12a,40 gehorsam auch gemachit ist
12a,41 willeclich biz in den dot”
12a,42 da von v-me vnser aller not
12a,43 qvam er in bethaniam
12a,44 da er die menscheit an sich nam

12b,1 durch daz er vns bekerete
12b,2 den rehten weg gelerete
12b,3 Mit siner wisen plege
12b,4 den stig die rehten wege
12b,5 der zvo iherusalem da gat
12b,6 hin in die hy-melischen stat
12b,7 //// da bi vernemit hvde
12b,8 waz Betphage bedude
12b,9 daz kvnde ich vch gemeine
12b,10 Iz ist die bichte reyne
12b,11 da man sal ane stede
12b,12 auch sin mit warer rede
12b,13 er sal auch sich bedrvoben
12b,14 der svnde vil erprvoben
12b,15 redeliche gar da bi
12b,16 wie groz avch sine svnde si
12b,17 wie vil ir si wie manigfalt
12b,18 vnde obe er in den svnden alt
12b,19 Ist worden mit vndruwen
12b,20 daz er alda mit ruwen
12b,21 moge sprechen alle zit
12b,22 also dauid in deme psalter quit
12b,23 “// h’re got dvo wollist dich
12b,24 hvde erbarmen vber mich
12b,25 laz dine groze barmherkekeit
12b,26 mir armen svnder sin bereit
12b,27 zvo lessene mine missedat
12b,28 der vil min lib begangen hat”
12b,29 //// Got aber dv dan biden salt
12b,30 v-me dine svnde manigfalt
12b,31 daz er dir die wolle vergeben
12b,32 vnde dir v’lihe ein reiniz leben
12b,33 dvrch die barmherzekeit
12b,34 got herre die din milde dreit
12b,35 // Fvr baz wil ich vch sagen me
12b,36 die selbe stat Betphagie
12b,37 die an deme oleyberge lit
12b,38 da von der glosen meister quit
12b,39 “von deme oleygebavme gar
12b,40 daz also wo-neclich gevar
12b,41 planzende vf deme berge stat

12b,42 betphagia den namen hat”
12b,43 //// da von vns die glose seit
12b,44 daz die barmherzekeit

13a,1 bedudit vns den oleyberg
13a,2 da von der barmekeide werg
13a,3 Sal stedis bi der bihte sin
13a,4 Svnder allen valschen schin
13a,5 // h’ noch sa prvbit snelle
13a,6 daz ir bi deme castelle
13a,7 daz eyn burg da ist genant
13a,8 sal die werlit sin bekant
13a,9 die alle zit vnde alle vrist
13a,10 Jesv Christo wieder ist
13a,11 daz wiszit vf die druwe min
13a,12 krist sprac-h- zvo zwein ivngeren sin
13a,13 “//// Ir svllit gen in daz castel
13a,14 daz da wieder vch ist snel
13a,15 da vindit ir gebvnden stan
13a,16 an allen zwifelichen wan
13a,17 eyn eselinnen vnde ir kint
13a,18 die brengit mir alse sie da sint”
13a,19 // nvo kvnde ich vwen sinnen
13a,20 daz auch die eselinnen
13a,21 bedudit vns der ivden schar
13a,22 die mit der svnden seilen gar
13a,23 was gebunden vmmer me
13a,24 da von vnde sie die godis . e .
13a,25 avch hielden alle gliche
13a,26 vil gar vnrechtecliche
13a,27 //// Fvrbaz me si vch geseit
13a,28 den ivngen esil den got reit
13a,29 Mit demvodeclicher kraft
13a,30 bedudit vns die heidenschaft
13a,31 die in den svnden lagen
13a,32 vnde keyner . e . in plagen
13a,33 // zvo den zwein folken vor genant
13a,34 got vnsir h’re hat gesant
13a,35 auch zwene ivngeren reyne
13a,36 da bi verstet gemeine
13a,37 die heiligen lerere
13a,38 vnde auch die bihtere
13a,39 die vil der folke hant bekart
13a,40 kristenliche werg gelart
13a,41 vnde hant daz folk enbvnden
13a,42 von allen ieren svnden
13a,43 //// Die Ivngeren zvo giengen
13a,44 den esel sie behingen

13b,1 den got da wolde riden
13b,2 al in den selben ziden
13b,3 mit ir kleideren her vnde dar
13b,4 da miede ist vns bedudit gar
13b,5 die werg der barmherzekeit
13b,6 Jesus gein iherusallem reit
13b,7 die kinder alle von der stat
13b,8 hvben sich hin vf den phat
13b,9 Sie giengen ieme engeyne
13b,10 vnde enphiengen en gemeyne
13b,11 die kinder svngen da zvo vrist
13b,12 “hie kv-mit der gese-nit ist”
13b,13 die selben reynen kinder gar
13b,14 bedvdent vns der engel schar
13b,15 // Sa die schar die die este
13b,16 vnde auch der blvomen qveste
13b,17 Strauweten vf die erden
13b,18 auch deme hohen werden
13b,19 kristo alda durch ere
13b,20 beduden die bihtere
13b,21 die wol den esten glichen
13b,22 avch wiszit sicherlichen
13b,23 vnde allir hande bluomen gar
13b,24 wie schone daz sie sin gevar
13b,25 vnde allen grvonen lauben
13b,26 dvorch kristenlichen glauben
13b,27 den sie mit gvden werken
13b,28 Ie wolden volle sterken
13b,29 vnde den ir gvde lere
13b,30 hie hat gebreidit sere
13b,31 //// Die schar die sich enkleidete
13b,32 vnde vf den weg da bredete
13b,33 zvo lobe Christo daz gewant
13b,34 da bi die glose vns hat benant
13b,35 die heiligen mertelere
13b,36 die da dvrch kristis ere
13b,37 hant irs reynis libis leben
13b,38 Mit willen in den dot gegeben
13b,39 // nvo wil ich raden lieben kint
13b,40 Mir vnde allen die da sint
13b,41 hie in den haubitsvnden
13b,42 verknvoppit vnde verbunden
13b,43 wolte wir den banden lihten
13b,44 daz wir die svnde bihten

14a,1 wie groz sie si wie kleyne
14a,2 Ist daz der prister reyne

14a,3 vns da in ruwen vindit
14a,4 die bant er vns enbindit
14a,5 da miede wir sin gebvnden
14a,6 al in den selben stunden
14a,7 leit er vns an ein selig bant
14a,8 Ist penitencia genant
14a,9 //// al mit der buoze banden
14a,10 wirt man der svnden schanden
14a,11 Entladen vnde des tvfelis list
14a,12 da von iz me dan sorglich ist
14a,13 der sich sa missewarit
14a,14 daz er die svnde sparit
14a,15 biz vf des gri-men dodis zit
14a,16 Jeronimus da vone quit
14a,17 “// Ey selig man ey selig wib
14a,18 vnde sa bevangen ist din lib
14a,19 Mit grozer suchede manigfalt
14a,20 dan kvme dvo gedenken salt
14a,21 an dine grozen missedat
14a,22 der vil din lip begangen hat
14a,23 war v-me dinis herzen sin
14a,24 kerit v-mer sich dar hin
14a,25 da dvo hast smerzen vnde sir
14a,26 des solden allewege wir
14a,27 hie sin bereit al vf den dot
14a,28 wan der lip hat sa groze not
14a,29 Sa des gri-men dodis kraft
14a,30 an ieme wirdit sighaft
14a,31 daz er gedenkit nvdis me
14a,32 wen an daz bitterliche we
14a,33 da miede bevangen ist der lip
14a,34 ey selig man ey selig wip
14a,35 des volgit mime rade ein deil
14a,36 hie wirkit vwer sele heil
14a,37 die wile ir hat kraft vn- maht
14a,38 Lat vch des gri-men dodis naht
14a,39 niht finden svnder gyde dat”
14a,40 dit ist Iheronimvis rat
14a,41 //// Des svllen wir alle gemeine
14a,42 hie Christo gen engeyne
14a,43 mit drier hande sache
14a,44 die ich vch kvndig mache

14b,1 // Des ersten mit demvodekeit
14b,2 die da bi rehter warheit
14b,3 der leide tvfel fliehen mvoz
14b,4 da von sa sprichit Iacobus
14b,5 der zwelfbode groz gedan

14b,6 “deme tvfele solt ir widerstan
14b,7 Sa mvoz er vlihen drade
14b,8 von vch vnde sin vngnade”
14b,9 //// daz ander ist daz ir daz leben
14b,10 In keyne girheit svllit geben
14b,11 wolt ir nvo vberwinden gar
14b,12 die kranken w’lit daz ist war
14b,13 die der sele vnselde git
14b,14 also dauid in deme psalter quit
14b,15 “// Ist daz vch flvzit zvo daz gut
14b,16 Sa sehit daz ir it den mut
14b,17 daz herze lip vnde auch den sin
14b,18 zv sere ste vf den gewin
14b,19 groz gut der sele ist ein vergift
14b,20 gvt brengit grozer svnden drift”
14b,21 //// Die dritten sache ich sagen wol
14b,22 daz ist daz man avch krenken sol
14b,23 daz fleis al dvrrch der sele heil
14b,24 vnde let man werden iz zvo geil
14b,25 des wirt die sele schadehaft
14b,26 vnde beni-mit ir . er kraft
14b,27 // Da von sa sprichit pavlus hie
14b,28 alse ich vch wil bescheiden wie
14b,29 “Ir svllit vwer glider gar
14b,30 gode doden daz ist war”
14b,31 daz quit ir svllit gvde dat
14b,32 durch got wirken . vnde lat
14b,33 allen svndeclichen mvot
14b,34 Minnit got fvor alliz gvot
14b,35 //// Dvn wir daz sa wil vns geben
14b,36 got ein ewelichiz leben
14b,37 In der hohen trinitat
14b,38 da fravde nv-mer me zvorgat
14b,39 domonica secunda
14b,40 Erunt singna in sole et luna .
14b,41 Her vf wil ich eyn kleine
14b,42 nvo vz der glosen reine
14b,43 hie reden weiz got hvde
14b,44 waz vns die svnne dvde

15a,1 der man vnde auch die sterren
15a,2 daz mogen wir hie lernen
15a,3 an dirre stat mit warer list
15a,4 Bedudit vns die svnne krist
15a,5 von zweier hande sache
15a,6 die ich vch kvndig mache
15a,7 die erste ist daz die svnne
15a,8 Ist allir der werlede wvnne

15a,9 // Daz ander daz die svnne clar
15a,10 erluhtit al die w'lit gar
15a,11 //// Daz erste daz die svnne
15a,12 Ist al der werlede wvonne
15a,13 an ir des dagis zierde lit
15a,14 da von der zwelfbode quit
15a,15 "krist der ist mit rehter mvogent
15a,16 die hohe godeliche dvogent"
15a,17 werliche daz si vch geseit
15a,18 Er ist die godis wisheit
15a,19 von der ist gesprochen da
15a,20 In der wisheide bvoche sa
15a,21 "// Sinis antliczis wvonne
15a,22 Ist clarer dan die svnne
15a,23 vnde ober allen sterren clar
15a,24 Lvhtit sin antlicze gar"
15a,25 //// Zvo deme andern male quit Iohan
15a,26 von Christo der vil reyne man
15a,27 "Ich bin ein liht zvo aller zit
15a,28 Ich luhten durch die w'lit wit"
15a,29 // von dirre svnnen groz erkant
15a,30 Jesus Christus ist genant
15a,31 da inne sach man zeichen vil
15a,32 die ich vch benennen wil
15a,33 zvo diesen selben stunden
15a,34 daz waren die funf wvnden
15a,35 die er v-me vnse not enphieng
15a,36 an deme crvce da her hieng
15a,37 In apokalipsi dort
15a,38 von kristis wvnden diese wort
15a,39 quit Iohan "der gnaden heil
15a,40 der svnnen schin daz dritteil
15a,41 Ist benv-men vnde erslagen"
15a,42 daz meynen ich alse ich vch wil sagen
15a,43 //// an kriste daz si vch geseit
15a,44 Leit den dot die menscheit

15b,1 die sele noch die godeheit
15b,2 Ieweder keynen kv-mer leit
15b,3 von des gri-men dodis we
15b,4 nvo wil ich vch beduden me
15b,5 // waz auch nvo si der mane
15b,6 Iz ist die wol gedane
15b,7 reyne muder vnde meit
15b,8 glichit sich si vch geseit
15b,9 deme manen hie vil lise
15b,10 In zweier hande wise
15b,11 //// Daz erste ist daz des manen kreiz

15b,12 Ist der erden gode weiz
15b,13 naher vf die druwe min
15b,14 wan alle die planeten sin
15b,15 // Daz ander ist daz er die naht
15b,16 erlvhtit gar mit siner maht
15b,17 Mit sinis schinis clarheit
15b,18 werliche daz si vch geseit
15b,19 //// also der mane zvo aller vrist
15b,20 deme ertriche allernehist ist
15b,21 wan alle die planeten sin
15b,22 also al vf die druwe min
15b,23 Ist die reyne kvsche magit
15b,24 Maria daz si vch gesagit
15b,25 bidende vmmer mere
15b,26 Ir kint fvr die svndere
15b,27 For allen heiligen die da sin
15b,28 geheiligit vf die druwe min
15b,29 // Die kvsche wol gedane
15b,30 Maria ist der mane
15b,31 In deme man groze zeichen sach
15b,32 also die glose mir veriach
15b,33 die zeichen was die groze not
15b,34 die sie leit von irs kindis dot
15b,35 //// Da von lucas gesprochen hat
15b,36 “dvrch din selbis sele gat
15b,37 Eyn swert” daz ist der smerze
15b,38 der ir drang durch daz herze
15b,39 da sie ir kint vnde ieren got
15b,40 Sach hangen an deme crvce dot
15b,41 // Die sterren vch bedudent hie
15b,42 die glose alse ich vch sagen wie
15b,43 bi in sa sollit ir verstan
15b,44 die zwelfboden groz gedan

16a,1 die sterren hie gene-nit sin
16a,2 In den sa wurden zeichen schin
16a,3 alse ich vch nvo bescheiden wil
16a,4 sie flvhen vf daz selbe zil
16a,5 da der groze h're zart
16a,6 krist Jesus gefangen wart
16a,7 //// Sie wurden alle zwifelhaft
16a,8 an siner godelichen kraft
16a,9 die zwelfboden gut erkant
16a,10 die hie sterren sint genant
16a,11 an den die zeichen da geschahen
16a,12 da die selben herren iahen
16a,13 “// verhoffit waren wir gemein
16a,14 krist der selig hie erschein

16a,15 daz er solde sin erstan
16a,16 Israhel erlosit han”
16a,17 //// die svnne reyne vnde da bi clar
16a,18 bedudit auch daz ist al war
16a,19 den gerehten gvden man
16a,20 der gode vil wol gediene- kan
16a,21 // von deme hat gesprochen sus
16a,22 der gvde ecclesiasticus
16a,23 “Der mensche heilig vnde gut
16a,24 blibit also die svnne dut
16a,25 In aller siner wisheit
16a,26 alsam die liechte svnne breit
16a,27 In zirckelis wise blibit sleht
16a,28 also der mensche vil gereht
16a,29 blibit sv-der allen schrancz
16a,30 an dvgentlichen werken gancz”
16a,31 Furbaz wiszit mere
16a,32 der mane den svndere
16a,33 bedudit sicherlichen auch
16a,34 ader eynen dv-men gauch
16a,35 der da in allen stvnden
16a,36 in haubithaften svnden
16a,37 zvo bosheit sich gesellit
16a,38 von svnde in svnde vellit
16a,39 //// von deme hat gesprochen sus
16a,40 der gude ecclesiasticus
16a,41 “// der dor ist wol deme mane- glich
16a,42 er wandelit sam der mane sich
16a,43 alle zit vnde alle zil”
16a,44 da von gesprochen hat Iohil

16b,1 “//// Der mane wandelit sich in blvot”
16b,2 da bi den svndere gar vnfrvot
16b,3 Sollit ir an allen wan
16b,4 bi deme blvode hie verstan
16b,5 // vnde der prophete osee
16b,6 da vone hat gesprochen me
16b,7 “daz bluot droffen hat daz blvot”
16b,8 daz meinit so oseis mvot
16b,9 daz von maniger svnden werg
16b,10 wirt ein svndeclicher berg
16b,11 //// da von sal man die svnde
16b,12 hazzen zvo aller stunde
16b,13 al durch vier hande sache
16b,14 die ich vch kvndig mache
16b,15 // dvrch daz sal man sie miden
16b,16 die svnde zvo allen ziden
16b,17 wan sie die sele dodit gar

- 16b,18 daz ist sicherliche war
16b,19 //// da von sal man auch hazzen sie
16b,20 die svnde stedecliche hie
16b,21 wan wer ir dienit daz ist sleht
16b,22 der ist auch hie der svnden kneht
16b,23 // auch sal man sie ie miden
16b,24 die svnde zvo allen ziden
16b,25 die vf des lesten dagis zil
16b,26 der sele brengent leidis vil
16b,27 Mit smerzen schaden schande
16b,28 vil groz vnde maniger hande
16b,29 //// avch svlle wir die svnde gar
16b,30 dar vmme hazzen vffenbar
16b,31 wan sie daz hy-melriche
16b,32 daz wiszit sicherliche
16b,33 deme menschen gar verlusit
16b,34 der sie zvo frunt erkvsit
16b,35 // he sal wiszen vnser mut
16b,36 daz wir han drier leye gvt
16b,37 daz wir noch godis lobe gar
16b,38 verzeren sollen daz ist war
16b,39 //// Ich wil sie vch ne-nen alle drvo
16b,40 daz ir sie erke-nen mogit nvo
16b,41 die sele gut vnde auch die zit
16b,42 ist diz sa die glose quit
16b,43 // daz erste daz ich sagen wil
16b,44 daz ist daz man auch alle zil
- 17a,1 die sele halde reyne
17a,2 vor svndeclichem meyne
17a,3 vnde daz wir sprechen mogen dan
17a,4 alse Iob der reyne man
17a,5 zvo deme waren gode sprach
17a,6 da er sin ende nahe sach
17a,7 “//// nvo vil lieber schepfer hir
17a,8 Mine sele geben ich wieder dir”
17a,9 // daz ander ist daz man daz gvt
17a,10 Laze deilen vnser mvt
17a,11 in die ses werg si vch geseit
17a,12 der waren barmherzekeit
17a,13 //// da vone Jesus sprichit so
17a,14 in deme ewangelio
17a,15 “// von hvnger was ich worden krank
17a,16 ir gabit mir spise vnde drang”
17a,17 //// daz dritte ist daz daz mensche sol
17a,18 diese zit bewenden wol
17a,19 in godis lobe vnde ere
17a,20 Sal auch he vmmer mere

- 17a,21 der mensche svenden sine zit
17a,22 da vone sante bernhart quit
17a,23 “// kranker mensche hie geborn
17a,24 die zit hast dvo vil gar verlorn
17a,25 in der dvo svnder allen spot
17a,26 niht hast gedaht an dinen got”
17a,27 //// dar vmme svlle wir irgeben
17a,28 die sele lip vnde auch daz leben
17a,29 herze sin vnde auch den mvt
17a,30 an den vil waren heilant gvt
17a,31 des hantgedat wir alle sin
17a,32 der da ist einer vnde trin
17a,33 daz der vns allen wolle geben
17a,34 daz wir hie also geleben
17a,35 in deme swachen libe
17a,36 daz dort die sele blibe
17a,37 bi gode in hy-melriche
17a,38 amen v-mer ewecliche
17a,39 domonica tercia aduentus
17a,40 Cvm audisset Iohnes in vinculis
17a,41 Vil gerne avch ich nvo hede
17a,42 von dirre glosen rede
17a,43 vnde were ich sa behende
17a,44 daz ich zvo gvdem ende
- 17b,1 die rede brengen kvnde
17b,2 der rede ich nvo begynde
17b,3 // da sante Iohan baptiste
17b,4 gefangen lag zvo kriste
17b,5 Zwene ivngeren sante er hin
17b,6 nvo sal auch pruoben vwer sin
17b,7 //// waz vns auch nvo Iohannes
17b,8 bedude vnde auch herodes
17b,9 waz die bant der kerker
17b,10 waz bedude auch daz er
17b,11 gedodit wart alda zvo stunt
17b,12 dit wirt vch alliz hie verkvnt
17b,13 // Iohan frvo vnde spade
17b,14 bedudit godis gnade
17b,15 vnde auch der name gvt Iohan
17b,16 bedudit eyenen rechten man
17b,17 //// wan keynem menschen kvmit in
17b,18 godis gnade in sinen sin
17b,19 in sines h’zen sin noch mvt
17b,20 er en si gerecht vnde da bi gvt
17b,21 // wan eime vngerechten man
17b,22 zvorgenglich gvt an allen wan
17b,23 wirt verlvhen daz verstat

- 17b,24 Fvr keyn zeichen gvt ir iz hat
17b,25 zvo godis gnade iz nit en zelt
17b,26 Iz ist niht wan ein wiedergelt
17b,27 //// von dirre w'lede alle zit
17b,28 gregorius da vone quit
17b,29 "wer dirre werlede eigenschaft
17b,30 besiczit gar mit siner kraft
17b,31 daz wiederahit daz ist war
17b,32 die godeliche gnade gar
17b,33 die des reynen menschen mvt
17b,34 Minnit gar fvor alliz gvt"
17b,35 // nvo prvobit alle lvde
17b,36 waz vns herodes dvde
17b,37 daz wil ich vch hie lan verstan
17b,38 er bedudit einen man
17b,39 der da ist vil gar verkart
17b,40 vnde alle vndvogent hat gelart
17b,41 er bedudit auch den tvfel
17b,42 der alle die w'lit in zwifel
17b,43 v'keren wil mit siner list
17b,44 alsame er verkerit ist
- 18a,1 //// Fvrbaz sa dvn ich vch bekant
18a,2 waz vns bedvden avch die bant
18a,3 Sie dvden alle bose dat
18a,4 die der mensche hie begat
18a,5 da vone der prophete hie
18a,6 quit also ich vch sagen wie
18a,7 "// wiszit der svndere seil
18a,8 ist der svnden groz vnheil
18a,9 da miede sie gebunden
18a,10 Sin gar zvo allen stvnden
18a,11 Sa daz ir sin vnde auch ir mvt
18a,12 beget diekeiner hande gvt"
18a,13 //// waz vns der kerker dvde dan
18a,14 daz prvobit frauwen vn- man
18a,15 der kerker gar ist dinster
18a,16 gar dief vn- da bi finster
18a,17 wer in den kerker wirt gelaht
18a,18 der verlusit sine maht
18a,19 er dorrit sam ein griebe
18a,20 er dvdit auch die liebe
18a,21 die der arme svnder hat
18a,22 zvo der svnden missedat
18a,23 reht also der kerker nodit
18a,24 den lip zvo ivngist dodit
18a,25 also die sele dodit gar
18a,26 die habitsvnde daz ist war

18a,27 // wa-ne der tufel der sathan
18a,28 eynen rehten gyden man
18a,29 zvo svnden brengit auch sin sin
18a,30 Sa dut er in den kerker in
18a,31 //// wer in den svnden blibit
18a,32 vnde sie die lenge dribit
18a,33 sa liebit ie die svnde
18a,34 daz wiszit zvo aller stvnde
18a,35 daz git zvo ivngist zwifel
18a,36 Svs dodit den der tvfel
18a,37 der svnder ruwen stirbit
18a,38 des sele gar virdirbit
18a,39 // von den Osee sprichit hie
18a,40 alse ich vch wil bescheiden wie
18a,41 “Ir arbeit hat gezzen
18a,42 fvr war svlt ir daz wezzen
18a,43 ein vremede volg mit listen
18a,44 da vm sie nit en wisten”

18b,1 //// nvo svllen alle lvde
18b,2 Mit wiczen prvoben hvde
18b,3 daz wiszit vf die druwe min
18b,4 // waz avch die zwene boden sin
18b,5 die Iohannes baptiste
18b,6 sante hin zvo kriste
18b,7 //// Er in hat noch nit vernv-men
18b,8 waz blinden la-men stv-men
18b,9 Maladen dode lvde
18b,10 vnde waz vns daz bedvde
18b,11 ich wil iz vch hie lan verstan
18b,12 vnde da der gyde man Iohan
18b,13 gefangen lag baptiste
18b,14 vnde da bi auch daz wiste
18b,15 daz er da sterben solde
18b,16 alse vnser h’re wolde
18b,17 // vnde da er dit erkante
18b,18 zwene ivngeren er da sante
18b,19 zvo kriste al vf daz selbe mal
18b,20 also ein ieglich mensche sal
18b,21 der in den haubitsvnden lit
18b,22 gefangen der sal in der zit
18b,23 auch sich zvo kriste wenden
18b,24 Er sal da kriste senden
18b,25 zwene boden alle zil
18b,26 alse ich vch wol bescheiden wil
18b,27 //// wolt ir nvo wiszen brvoder min
18b,28 wer diese zwene boden sin
18b,29 die wil ich dar v-me ne-nen

18b,30 daz ir wullit erke-nen
18b,31 iz ist die bihte die git vor
18b,32 die bvoze volgit irme spor
18b,33 // wa-ne der svnder daz verstat
18b,34 gebihtit sine svnde hat
18b,35 vnde auch die bvoze enphangen
18b,36 weiz got sa sint sie gegangen
18b,37 die zwene boden me dan zart
18b,38 Fvor Jesum Christum mit der fart
18b,39 //// zvo diesen boden gvt erkant
18b,40 beginnit krist der heilant
18b,41 Mit frvndis mv-de iehen
18b,42 “die blinden nvo gesehen”
18b,43 // bi den blinden sa versta-t
18b,44 die lvode die vngelauben hant

19a,1 wanne die got bekerit
19a,2 den rehten glauben lerit
19a,3 daz sie an got sint iehende
19a,4 sa sint sie worden sehende
19a,5 //// daz got die lamen dvt vf stan
19a,6 daz sie da laufen vnde gan
19a,7 daz bedudit vns daz got
19a,8 die lvde die da sin gebot
19a,9 versvmit han vil lange stvnt
19a,10 daz sie fuorbaz me rehte dvnt
19a,11 // Daz got malade lvde
19a,12 auch reynegit an der hvde
19a,13 da bi sa sullit ir verstan
19a,14 alle die da vnrechte gan
19a,15 vnde daz got die bekerit
19a,16 Sin heilige lare lerit
19a,17 //// Sa wiszit vf die druwe min
19a,18 die mvozen alle stv-men sin
19a,19 die got nit en lobent hie
19a,20 wan vnser lieber herre die
19a,21 zvo sime lobe kerit hin
19a,22 Sa wiszit daz er vffent in
19a,23 den mvnt die kelen vnde den mvt
19a,24 alsus got stv-men sprechen dvt
19a,25 // Sa dudint auch die armen kint
19a,26 gar alle die otmvdig sint
19a,27 vnde der wissagen dudit gar
19a,28 daz in got vffent daz ist war
19a,29 der ewangelia gewalt
19a,30 vnde sine gnade manigfalt
19a,31 //// Jesus der hat auch vf gewaht
19a,32 die doden lebendig gemahnt

- 19a,33 wanne er die svndere
19a,34 die svnde schemebere
19a,35 hazzen vnde vliehen dvt
19a,36 vnde daz er kerit ieren mvt
19a,37 zvo fruteclicheme ruwen
19a,38 reht alse er spreche en druwen
19a,39 “// Soliche ich kan erschrecken
19a,40 Min gnade erluhten wecken
19a,41 daz sie von svnden keren
19a,42 ich kan sie wol geleren
19a,43 daz sie gar alle gliche
19a,44 avch wirkent dvgentliche”
- 19b,1 //// nvo helfe vns krist der milde
19b,2 in deseme mere wilde
19b,3 da inne wir diefe sweben
19b,4 daz wir also geleben
19b,5 noch kristenlicher lere
19b,6 daz wir vz dieseme mere
19b,7 gar mit elenthafter hant
19b,8 gervgen in daz vaterlant
19b,9 daz fraude svnder ende hat
19b,10 des hilf vns hohe trinitat . ame-
19b,11 domonica quarta
19b,12 Miserunt iudei ab iherosolimis
19b,13 kvnde ich vz dirre glosen
19b,14 nvoczlichis it gekosen
19b,15 daz dede ich gerne vnde wer is fro
19b,16 in deseme ewangelio
19b,17 //// Sa sollent alle lvde
19b,18 binamen prvben hvde
19b,19 hie zweier hande sache
19b,20 die ich vch kvntlich mache
19b,21 // die erste sache weiz got ist
19b,22 daz vnser herre ihesus krist
19b,23 Sa er mit siner gnade
19b,24 hin in den menschen drade
19b,25 kv-met svnder allen wan
19b,26 waz er in ieme wirke dan
19b,27 des wil ich vnderwissen hie
19b,28 vch binamen also wie
19b,29 //// Sa krist Jesus der heilant
19b,30 in den menschen hat gesant
19b,31 die sine grozen gnade
19b,32 sa wiszit daz er drade
19b,33 wil in deme menschen wirken
19b,34 Ses ding die sollit ir merken
19b,35 // die ersten sache merkit

19b,36 daz ist daz daz er da wirkit
19b,37 in den lvdn die da sint
19b,38 von rehter hohfart worden blint
19b,39 daz er die si vch geseit
19b,40 irluhtit mit otmvdekeit
19b,41 //// Sa wiszit furbaz mere
19b,42 hochfart vnde idel ere
19b,43 sint alse ein wolkenblig vil clar
19b,44 sie verblendint daz ist war

20a,1 der selen augen me dan fin
20a,2 wie der blig ha kvorzen schin
20a,3 sa ist er doch vil schadelich
20a,4 den avge- also sp-chen ich
20a,5 sa ist auch die hohfertekeit
20a,6 deme menschen daz si vch geseit
20a,7 der vf der erden schinen wil
20a,8 in hohfertekeide vil
20a,9 // Soliche lvde daz ist bekant
20a,10 die ir hohfart hat geblant
20a,11 Sa daz ir sele nit en mag
20a,12 gesehen krist den waren dag
20a,13 die dvt got mit demvdekeit
20a,14 gesehen daz si vch geseit
20a,15 //// Otmvdekeit vil dauge
20a,16 binamen ist ein auge
20a,17 Mit deme sich der mensche gar
20a,18 mag besehen her vnde dar
20a,19 beide nvo vnde alle zit
20a,20 // wie daz sin dun sin leben lit
20a,21 wie ist die ander sache dan
20a,22 daz sagen ich vch obe ich kan
20a,23 iz ist daz vnser herre do
20a,24 in den lvdn wirkit so
20a,25 werliche daz si vch geseit
20a,26 Sawaz die bose girekeit
20a,27 binamen hat verlemit hie
20a,28 daz krist binamen alle die
20a,29 Mit siner waren liebe kan
20a,30 heilen daz sie rehte gan
20a,31 //// der bose girekeyde mvt
20a,32 den menschen hie v'lamen dvt
20a,33 an beiden sinen fuozen gar
20a,34 des lisit man vffenbar
20a,35 in der kvnige bvoche hie
20a,36 alse ich vch wil bescheiden wie
20a,37 Savlis svn er Ionathas
20a,38 deme was mit name- also ich las

20a,39 ein kint ein lieber svn bedet
20a,40 der was genant mifboset
20a,41 von fvnf iaren was sin zil
20a,42 daz kint der ammen da envil
20a,43 einis dagis vf die erden hart
20a,44 da von daz kindelin vil zart

20b,1 wart an beiden fuozen lam
20b,2 in der glosen ich vernam
20b,3 daz vns bedudit Ionathas
20b,4 eyne dvben sa ich las
20b,5 zvo kv-mende mit reiner list
20b,6 die selbe dube dudit krist
20b,7 // der in diese werlit quam
20b,8 da er die menscheit an sich nam
20b,9 gar alse ein dube reine
20b,10 in dise werlit eine
20b,11 brachte krist der werde gast
20b,12 des oleybavmis einen ast
20b,13 der was grvner dan ein gras
20b,14 vns bedudit sa ich las
20b,15 //// der oleybaum mit warheit
20b,16 Friede vnde barmherzekeit
20b,17 der zweier grozen gnade gelt
20b,18 sa brathe krist in dise werlit
20b,19 den da die glose Ionathas
20b,20 dvorch daz auch ne-nit sa ich las
20b,21 wan er mag alle wonder dvn
20b,22 dissis Ionathasis svn
20b,23 Ist ey- eklich kristen lib
20b,24 iz si ein man iz si ein wib
20b,25 daz wiszit bi der warheit min
20b,26 sa dirre svn der ammen sin
20b,27 enpellit vz eren armen sleth
20b,28 sa wirt er lam vnde vngereth
20b,29 // wolt ir nvo wizzen auch hie bi
20b,30 wer da auch vnser amme si
20b,31 daz wirt vch hie von mir geseit
20b,32 die godeliche fursithekeit
20b,33 alle zit vnde alle frist
20b,34 vnse foderinnen ist
20b,35 Sie fodit vns des dankit ir
20b,36 ir sollit wizzen daz auch wir
20b,37 vz ieren armen fallen dan
20b,38 sa wir nit follen glauben han
20b,39 daz vns die godeliche maht
20b,40 Fode alle zit dag vnde naht
20b,41 //// dit ist alse ich vch sagen wil

20b,42 sa wir besorgit sin zvo vil
20b,43 in dirre widen werlede ring
20b,44 vm ir irdislichiz ding

21a,1 // Sa vnser herze vnde vnser sin
21a,2 alle zit vf den gewin
21a,3 bedrattit ist zvo sere
21a,4 wie er daz gvt gemere
21a,5 dvorch dirre girekeide gir
21a,6 dar vmme sa verlamen wir
21a,7 an beiden vnser fvozen gar
21a,8 wir verliesen avch daz ist war
21a,9 da mede svnder allen wan
21a,10 die liebe die wir solden han
21a,11 zvo kriste deme wehesten
21a,12 vn- auch zvo vnser nehesten
21a,13 //// die girekeit vnde auch ir gebot
21a,14 en mag den mi-neclichen got
21a,15 hie nv-mer me geminnen
21a,16 Mit retheclichen sinnen
21a,17 noch sinen ebenkristen
21a,18 Mit keynen gvden listen
21a,19 verfluochit ist der name
21a,20 wen ein solicher lame
21a,21 ist myfiboset genant
21a,22 der name ist bose gnvng irkant
21a,23 wan er bedudit einen mvnt
21a,24 deme alle bosheit ist wol kvnt
21a,25 // Ich sagen vch vf minen eit
21a,26 daz avch soliche girekeit
21a,27 also ich mit warheit sprechen mag
21a,28 al vf den ivngestlichen dag
21a,29 sa hie der lib verendit
21a,30 die sele wirt geschendit
21a,31 svnder endelose zit
21a,32 sa vnser herre zvo in quit
21a,33 Mit einer grozen stimme svr
21a,34 “get in daz ewecliche fvr”
21a,35 //// wie ist die dritte sache dan
21a,36 daz sagen ich vch obe ich kan
21a,37 daz ist daz vnser herre krist
21a,38 in deme mensche- wirkende ist
21a,39 Mit siner richen gnade rat
21a,40 sawer ist worden malat
21a,41 von deme snore missefar
21a,42 daz Jesus den wil heilen gar
21a,43 Mit der vil reynen kvsekeit
21a,44 werliche daz si vch geseit

21b,1 // Sa wiszit daz binamen die
21b,2 die snorliche lebent hie
21b,3 die stinkent alse ein fvllir mist
21b,4 vor godis avgen alle frist
21b,4a d' snor die sele swechit gar
21b,4b Er machit sie malatgefar
21b,4c For godis avge- alle zit
21b,4d Leviticus daz buoch quit
21b,5 "//// vier hande leie ist daz malat
21b,6 er ist selig der ir keiniz hat"
21b,7 // daz eine hant die lvde
21b,8 Mit namen an der hvde
21b,9 //// daz ander malat z ware
21b,10 hant sie an deme hare
21b,11 // daz dritte mit warheide
21b,12 hant sie an deme cleide
21b,13 //// daz fierde malat missefar
21b,14 daz lit an ieren hvsen gar
21b,15 // alsus vier hande malat sint
21b,16 an gar vil lvden lieben kint
21b,17 die ich vch svnderliche wil
21b,18 beduden vf dit selbe zil
21b,19 //// daz malat an der hvde
21b,20 daz hant weiz got vil lude
21b,21 Meistdeilig ivnge dv-me wib
21b,22 vnde die da zieren ieren lib
21b,23 al durch ir dauben wicze
21b,24 daz sie auch ir antlicze
21b,25 die hende kelen vnde nag
21b,26 wa man sie bloz gesehen mag
21b,27 Sich salbent allentalben
21b,28 Mit einer hande salben
21b,29 die auch dar zvo gemachit ist
21b,30 daz sie gar eine cleine frist
21b,31 Schinit wiz vnde da bi rot
21b,32 Soliche zirde hazzit got
21b,33 alle zit spade vnde frvo
21b,34 Sie horit endecriste zvo
21b,35 die schemeliche missedat
21b,36 // Sa hant ein deil daz malat
21b,37 werliche an deme hare
21b,38 vil gnvng der paffen z ware
21b,39 ritter knappe welich man
21b,40 daz wiszit svnder allen wan
21b,41 die heimeliche vnde vffenbar
21b,42 zvo crvllen machent slechtiz har
21b,43 //// vil manig wib daz malat

- 21b,44 da bi an deme hare hat
- 22a,1 al von den selben wiben sus
22a,2 gesprochen hat Ieronimus
22a,3 “// Sie glichent sich den bocken
22a,4 die da mit fremeden locken
22a,5 ir haubit vnde ir nollen
22a,6 werliche zieren wollen”
22a,7 vn- die da feruwen swarziz har
22a,8 daz iz da wirdit gelgefär
22a,9 vnde die mit goldis binden
22a,10 ir haubit vmmewinden
22a,11 vnde die sich zvo allen malen
22a,12 dar zvo mit den schappalen
22a,13 zymeren vnde cronen
22a,14 nvo wiszit daz die honen
22a,15 Sich . vnde daz dut der sele we
22a,16 sa wil ich vch doch sagen me
22a,17 //// daz auch vil lude daz malat
22a,18 werliche dragent an der wat
22a,19 alse ich vch wil bescheiden
22a,20 iz sint die sich da cleiden
22a,21 oppecliche zvo aller stunt
22a,22 die da den zabel vnde daz bunt
22a,23 vnde auch die duoch von siden
22a,24 durch hohfart vndersniden
22a,25 halberen vnde fieren
22a,26 von maniger hande dieren
22a,27 versnident auch dar vnder
22a,28 die fische die merwonder
22a,29 in ein mit ein befangen
22a,30 dar vf goldine spangen
22a,31 Mit silberinen kneufen
22a,32 die sich zvosamene sleufen
22a,33 iz sin die man iz sin die wib
22a,34 die sus da zeren ieren lib
22a,35 des hat der tvfel sinen spot
22a,36 daz sie sa lebent wieder got
22a,37 da miede sie sich krenken
22a,38 vnde daz sie nit gedenken
22a,39 an den allerersten stam
22a,40 wie vnser vater her adam
22a,41 vnde eva vnser muoder
22a,42 wie sie auch got der gvoder
22a,43 bekleidete mit prise
22a,44 da vz deme paradise
- 22b,1 Sie det den engel driben

22b,2 binamen den zwein liben
22b,3 auch kein gewant en wolde
22b,4 got legen an von golde
22b,5 von silber noch von siden
22b,6 noch samit an sich sniden
22b,7 den pellin noch den schamelat
22b,8 wen got beschit in eine wat
22b,9 alda den selben lvden
22b,10 von wilder dyere hvden
22b,11 Mit ruwen langen locken
22b,12 gap er in an zvo rocken
22b,13 da bi dut vns got irkant
22b,14 daz hohfertecliche gewant
22b,15 der armen sele dut gar we
22b,16 avch wil ich vch nvo sagen me
22b,17 // daz auch vil lvde daz malat
22b,18 Mit namen in den hvsen hat
22b,19 daz wiszit mit warheiden
22b,20 alse ich vch wil bescheiden
22b,21 des sult ir mir geleuben
22b,22 daz sint die da ir leuben
22b,23 ka-meren sthoben die palas
22b,24 dar in malent wiszit daz
22b,25 beide frauwen vnde man
22b,26 al sie mit armen vmme wan
22b,27 sich . vnde da bi sprenzen
22b,28 die wib in gelwen swenzen
22b,29 bereit von abenturen
22b,30 Mit fidelin vnde tamburen
22b,31 bosunen . harpen . liren
22b,32 da bi auch nit en firen
22b,33 die mit den schalmeien
22b,34 rehte alse sie danzen reien
22b,35 stant sie an den gelazen
22b,36 die ros reht also sie grazen
22b,37 stent sie da bi vil bitter
22b,38 vf iedaz ros ein ritter
22b,39 verwapent maniger leie
22b,40 also zvo eime turneie
22b,41 vergadern vnde stappen
22b,42 vn- auch die wapenknappen
22b,43 da bi vnde ir wartfrien
22b,44 seth alse in einer krien

23a,1 die knappen schrien nemit war
23a,2 wie iz nvo legit her vnde dar
23a,3 diese ritterliche schar
23a,4 ein eclich hus binamen gar

23a,5 daz soliche zirde hat
23a,6 daz hus ist da malat
23a,7 soliche zirde werfent hin
23a,8 die vch vnreynen mag den sin
23a,9 Mit der vnkvscheide gir
23a,10 sa kv-mit got des glaubit mir
23a,11 al mit der kvscheide drift
23a,12 den snor vnde alle ir eitergift
23a,13 v'dribit vz den herzen gar
23a,14 //// die kvscheit snewizgefar
23a,15 die kvscheit die dvgent hat
23a,16 daz sie diekeinen vnflat
23a,17 en lidit mit warheide
23a,18 von der vnkvscheide
23a,19 // Sie wil ie daz des herzen sin
23a,20 al vnkvscheit werfe hin
23a,21 vzerliche vnde dauge
23a,22 Ioch daz des herzen avge
23a,23 avch habe da mit ichte
23a,24 diekein snorlich gesitte
23a,25 //// Ioch daz der mvnt die zvnge
23a,26 Mit keiner handelvnge
23a,27 der smeichenden vnkvscheit
23a,28 Mit keinen dingen si bereit
23a,29 // daz sehen . horen . vn- daz gan
23a,30 sal alle vnkvscheit lan
23a,31 daz wiszit algemeine
23a,32 sa machit got vil reine
23a,33 den sin . den mvt . des herzen brvst
23a,34 von der vnkvscheide lvst
23a,35 die der sele dvt gar we
23a,36 //// zvo deme vierden male wirkit me
23a,37 die godeliche gnade
23a,38 avch in deme menschen drade
23a,39 alse vns die glose hie beseit
23a,40 weme dirre w'lede wirdekeit
23a,41 die da verflugit sam ein staup
23a,42 hie gemachit habe davp
23a,43 daz sin gehorde ligit nider
23a,44 deme git sie got dan wider

23b,1 Sa er hie prubit ebene
23b,2 die w'lit an irme lebene
23b,3 wie daz ir dun vn- auch ir dat
23b,4 diekeine stedekeit en hat
23b,5 // binamen alle lvde
23b,6 daz sagen ich vch hvde
23b,7 den dirre werlde frolichkeit

- 23b,8 liebet vf minen eit
23b,9 die horent node godis wort
23b,10 an allen enden hie vnde dort
23b,11 die selben dauben grifen
23b,12 vil lieber horent pifen
23b,13 da mit den schalmeien
23b,14 die denze vnde auch die reien
23b,15 vf shahen mit tamburen
23b,16 en liebit daz balvren
23b,17 nvo sollit ir des glauben
23b,18 daz von den selben dauben
23b,19 hat gesprochen sa ich las
23b,20 dvrch godis mvnt ysaia
23b,21 “wer mag andirs wesen daup
23b,22 sam ein dvnne dvrriz laup
23b,23 wen die ich zvo den han gesant
23b,24 die mine boden gvt irkant
23b,25 die werden predigere
23b,26 von den sie mine lere
23b,27 werliche lernen solden
23b,28 vnde ir nit horen wolden”
23b,29 //// die fvnfte sache daz ist die
23b,30 daz in deme menschen wirkit hie
23b,31 der svoze mi-necliche got
23b,32 sawen der zwifil hat gedot
23b,33 daz mit der hoffenvnge den
23b,34 got lezit wieder vf irsten
23b,35 // die svnde vnde auch der tufil
23b,36 die gent solchen zwifil
23b,37 der vil selen hat geschant
23b,38 vn- in den hellegrvnt gesant
23b,39 //// rethe also ein sicher mensche ligit
23b,40 vn- auch solcher krankheit pligit
23b,41 vn- daz da zeichenliche sit
23b,42 der arzit daz der mensche nit
23b,43 der svchede hie genesen kan
23b,44 alsoliche schade lit dar an
- 24a,1 der sele die den zwifel hat
24a,2 daz ir moge v-mer werden rat
24a,3 // vil lvde hant den zwifil
24a,4 daz dvt der leide tufil
24a,5 vnde ir vil groze missedat
24a,6 die ir lib da begangen hat
24a,7 daz sie gedenkint manig zil
24a,8 “der miner svnden ist sa vil
24a,9 daz mir Jesus der here
24a,10 vergibit nv-mer mere”

24a,11 //// dvt hin den zwifelichen stoz
24a,12 kein svnde en wart noch nie sa groz
24a,13 die svnde si an alle zil
24a,14 der svnden wart noch nie sa vil
24a,15 die svnde en wart noch nie sa breit
24a,16 die godis barmherzekeit
24a,17 si grozer vnde breider
24a,18 vnde ferren weg gereider
24a,19 in ruweclichem lebene
24a,20 die svnde zvo vergebene
24a,21 wie vil ir si wie swere
24a,22 dan mitten in deme mere
24a,23 ein gensterlin von eschen
24a,24 avch moge da verleschen
24a,25 // des sal ein eclich zvng
24a,26 hie ganze hoffenvnge
24a,27 auch han zvo Jesus kriste
24a,28 in aller siner friste
24a,29 die er vf erden leben mag
24a,30 er sal got biden naht vnde dag
24a,31 daz er eme wolle geben
24a,32 ein ruwelichiz leben
24a,33 vmme alliz daz er ie gedet
24a,34 Sa zvo hant hat sin gebet
24a,35 got verhorit an allen wan
24a,36 waz er dan svnden hat began
24a,37 vn- die versmelzent also ein sne
24a,38 got ir gedenkit nv-mer me
24a,39 //// die seste sache ist sa gefar
24a,40 daz Jesus in deme menschen gar
24a,41 wirkit daz si vch geseit
24a,42 Mit siner gnade selekeit
24a,43 also ich vch nvo bescheiden wil
24a,44 Man findit lvde harte vil

24b,1 die denkint sa dir ist gegeben
24b,2 daz dvo salt haben langiz leben
24b,3 // durch disen effenlichen wan
24b,4 sa svlt ir wiszen daz sie lan
24b,5 manege dugentliche dat
24b,6 ir mvt an bosheit sich gelat
24b,7 in eris libis ivgende
24b,8 des werdent sie an dugende
24b,9 also iemerlichen arm
24b,10 daz sie den selen kalt noch warm
24b,11 nvsniht hant zvo gebene
24b,12 von dugentlicheme lebene
24b,13 daz wol die sele spisit

- 24b,14 dit folg des vnderwisit
24b,15 vnser lieber herregot
24b,16 daz sie hie miede sin gebot
24b,17 verbrechent svnder alle not
24b,18 dar noch fvr legit in den dot
24b,19 krist daz sie sollen sterben
24b,20 dar noch dut sie got werben
24b,21 noch deme hy-melriche
24b,22 got dut sie werben gliche
24b,23 noch gvden werken gerne
24b,24 al zvo des lebens erne
24b,25 der ewekeide laden kan
24b,26 Svs Jesus frauwen vnde man
24b,27 vil lvde sint vf erden
24b,28 die da ie wollent werden
24b,29 auch me dan alt der iare
24b,30 dar v-me sie auch z ware
24b,31 v'sument gvder werke frvht
24b,32 Solichen lvden godis zvht
24b,33 vnderwilen sendet in
24b,34 godis gnade in eren sin
24b,35 daz sie von srecken ruwig stan
24b,36 daz sie sa vil gesvndit han
24b,37 die forthe dut sie wiczig
24b,38 des geistis sa inhiczig
24b,39 daz in gibit groze sterke
24b,40 da von sie gvder werke
24b,41 gar dvgentlichen samen
24b,42 in ihesv kristis namen
24b,43 hie sewent vf der erden
24b,44 der in mvoz nvocze werden
- 25a,1 in deme hi-melriche
25a,2 da sie in ewecliche
25a,3 Mit frauden sniden sollen
25a,4 Mit aller eren follen
25a,5 //// welichen samen wisze krist
25a,6 vf der erden hie des menschen list
25a,7 sewit in sinen ziden
25a,8 des frvht sal er dort sniden
25a,9 da von sa wesit wacker
25a,10 dvrchbuwit vwen acker
25a,11 Mit gvder handelunge
25a,12 halt in in rehter dvnge
25a,13 gvden samen werfit dr vf
25a,14 sa get er sicherlichen vf
25a,15 // scheidit dar vz den raden
25a,16 der guden frvhte schaden

25a,17 werliche er brengit dicke
25a,18 vnde auch die vogilwicke
25a,19 der hvndis dille kaczenzagil
25a,20 dit vncrvt ist gar ein hagil
25a,21 der gvde frvht vernihtit
25a,22 daz vngecrude flichtit
25a,23 Fvor sich da vmmer mere
25a,24 des sal man ieme sere
25a,25 vnde festelichen weren
25a,26 wil man die frvht generen
25a,27 //// dit mag man dvn vil gerne
25a,28 sa iz gat an die erne
25a,29 wes acker dan richliche stat
25a,30 vnde vngecrvdis nit en hat
25a,31 sa frauwit sich der mensche dan
25a,32 daz er den acker ie gewan
25a,33 // waz diese rede dvde
25a,34 daz wil ich sagen hvde
25a,35 den lvden algemeyne
25a,36 eyn eclich mensche reyne
25a,37 des herze dvgentliche dvt
25a,38 bedudit disen acker gvt
25a,39 //// der ruweliche smerze
25a,40 den auch ein ruwig herze
25a,41 hie dreit zvo aller stvnde
25a,42 vmme sine groze svnde
25a,43 bedudit vns die dvnge
25a,44 den sewer wol die zvnge

25b,1 bedudit vns vnde auch ir ort
25b,2 // der same dudit godis wort
25b,3 den auch die zvnge her vn- dar
25b,4 sewit in den acker gar
25b,5 Mit dvgentlichis herzen zvht
25b,6 sa dudit vns die gvde frvht
25b,7 aller gvden werke dat
25b,8 die der mensche hie begat
25b,9 //// Sa dudit vns mit warheit
25b,10 der bv des menschen arbeit
25b,11 Mit gvder bilde laste
25b,12 die venie vnde die faste
25b,13 da an iz blibit stede
25b,14 Mit andaht . an gebede
25b,15 an dvgentlicher wache
25b,16 vnde da bi deme gemache
25b,17 Festeliche wiederste
25b,18 waz sal nvo lange rede me
25b,19 wer dise ding dvt alle mal

- 25b,20 der buwit disen acker wal
 25b,21 // Sa dvdit vns der rade
 25b,22 der svndecliche schade
 25b,23 der dicke guder werke sat
 25b,24 werliche gnv̄g verderbit hat
 25b,25 //// daz crut die fogilwicke
 25b,26 die wessit vf sa dicke
 25b,27 daz sie zvosamene hangit
 25b,28 waz sie da von belangit
 25b,29 der frvht alle ir glieder
 25b,30 die zvh̄it sie der nieder
 25b,31 wolt ir nvo wiszen hvde
 25b,32 waz vns dit crut bedude
 25b,33 die bose vogilwicke
 25b,34 iz sint die augenblicke
 25b,35 die man auch her vnde dar
 25b,36 werfent an die frauwen gar
 25b,37 die frauwen wieder an die man
 25b,38 wiszit svnder allen wan
 25b,39 daz so die vogilwicke
 25b,40 Ich meynen die avgenblicke
 25b,41 binamen dicke hant verdrvht
 25b,42 der werden kvsekeide frvht
 25b,43 // Sa sagen ich vch vberlv̄t
 25b,44 des svren hv̄ndis dillis crvt

 26a,1 binamen da daz wassen wil
 26a,2 da wirt sin also vobervil
 26a,3 daz er diekeine gvden sat
 26a,4 nv-mer me vf kv-men lat
 26a,5 //// nvo prvbit alle hvde
 26a,6 waz vns dit crvt bedvde
 26a,7 der svre hv̄ndis dille
 26a,8 iz ist der eigenwille
 26a,9 den got deme menschen hat v'lan
 26a,10 w' deme willen noch wil gan
 26a,11 Mit der folge zv allir zil
 26a,12 da wirt der svnden also vil
 26a,13 daz keine dv̄gentliche dat
 26a,14 der mensche nv-mer me begat
 26a,15 der hv̄ndis dille ist vch bedvt
 26a,16 // der kacenzagil daz vncrv̄t
 26a,17 wil ich beduden alle fart
 26a,18 der kacenzagil hat den art
 26a,19 daz er in ganzer slithe
 26a,20 wesit vf die rithe
 26a,21 schone gnv̄g ist sin blvt
 26a,22 vnde ist da bi zvo nvde gvt

26a,23 der kacenzagil wa er stat
26a,24 der derrit alle gvde sat
26a,25 von siner angeboren art
26a,26 des dvidit er die hohfart
26a,27 binamen daz si vch geseit
26a,28 sa wiszit daz die hohfartekeit
26a,29 en nvczit da zvo nihte
26a,30 doch dvnkit sie die rihte
26a,31 daz ir da ieman wese glich
26a,32 fvor alle lvde wil sie sich
26a,33 irheben vmmer mere
26a,34 in idelicher ere
26a,35 hoh vf sa wessit ir der mvt
26a,36 alse auch der kacenzagil dvt
26a,37 der da mit siner vngenvht
26a,38 verderbit alle gvde fruht
26a,39 //// In glicher wis hohfertekeit
26a,40 verderbit vf minen eit
26a,41 gar alle dvgentliche dat
26a,42 die man mit hohfart hie begat
26a,43 daz sie vor gode hei ia hei
26a,44 en golden nit ein halbiz ei

26b,1 // nvo lat vns alle biden krist
26b,2 durch sinen godelichen list
26b,3 durch sine grozen gvde
26b,4 daz er vns gar behude
26b,5 vnnde alle gvde lvde
26b,6 vor diseme vngecrvde
26b,7 daz also grozen schaden dut
26b,8 an der vil reynen frvhte gut
26b,9 die man noch dodis ziden
26b,10 sal wo-neclichen sniden
26b,11 Mit frauden ewecliche
26b,12 amen . in deme hi-melriche

159a,15 In die parasceue signa que
159a,16 fiebant in passione domini
159a,17 Die zeichen ich vch alle sage
159a,18 die vffe deme selben dage
159a,19 geschahen da der h're zart
159a,20 durch vnser heil gedodit wart
159a,21 // daz erste zeichen daz geschach
159a,22 sa die glose mir veriach
159a,23 daz was daz al ertriche
159a,24 also gar engisliche
159a,25 erbibete vor der grozen not
159a,26 da vnser herre leit den dot

159a,27 //// daz ertbiben groz gedan
 159a,28 bedudit vns an allen wan
 159a,29 der reinen herzen forhte
 159a,30 noch des ppheten worte
 159a,31 vn- der da hat gesprochen hie
 159a,32 alse ich vch wil bescheiden wie
 159a,33 “godis forhte mit warheit
 159a,34 Ist anevang der wisheit”
 159a,35 // die svnne al vf den selben dag
 159a,36 alse ich mit warheit sprechen mag
 159a,37 v’los auch ieren claren schin
 159a,38 daz dvdt vf die druwe min
 159a,39 daz man die cranken w’lit sal
 159a,40 v’smehen weiz got alzvomal
 159a,41 //// da vone sante Iohan
 159a,42 gesprochen hat der reine man
 159a,43 “w’ die w’lit minnit gar
 159a,44 vn- ir mit vlize nimit war

159b,1 der in mag an allen wan
 159b,2 zvo gode keine liebe han”
 159b,3 // des selben dagis die steine
 159b,4 zvorizzen algemeine
 159b,5 von einander wisze krist
 159b,6 da miede vns auch bedudit ist
 159b,7 daz wiszit die bedrvbekeit
 159b,8 die da ein drvrig herze dreit
 159b,9 von der svndeclichen dat
 159b,10 die sin lib hie begangen hat
 159b,11 //// da von auch dauid
 159b,12 In deme selter alsus qvid
 159b,13 “sa eins bedrvobeten me-sche- mvot
 159b,14 got h’re dir sin opfer dvot
 159b,15 daz herze daz den ruwen hat
 159b,16 vnde demvdecliche stat
 159b,17 daz en wolle lieber got
 159b,18 niht versmahen din gebot”
 159b,19 // al vf den namelichen dag
 159b,20 sa ich die warheit spreche- mag
 159b,21 der greber sich da gnvng ensloz
 159b,22 der doden von der martel groz
 159b,23 die iesus leit der mi-nen drvt
 159b,24 da miede sa ist vns bedvt
 159b,25 des reinen h’zen bihte gvt
 159b,26 die hie der mvnt mit ruwe- dvt
 159b,27 //// der apostel Iacobus
 159b,28 da von gesprochen hat alsvs
 159b,29 “der ein deme andern bihten sal

159b,30 die svnde sin daz kv-mit wal”
159b,31 nvo bihtit algemeine
159b,32 daz dut vch svnden reine
159b,33 // auch vf daz nameliche zil
159b,34 stvnden vf der doden vil
159b,35 von der vil engeslichen not
159b,36 da vnser herre leit de- dot
159b,37 der doden vferstende
159b,38 die da an cristis ende
159b,39 geschach mit wonderlich’ list
159b,40 da miede auch vns bedudit ist
159b,41 daz got auch alle missedat
159b,42 dem me-schen gar v’geben hat
159b,43 der svndeclichiz leben
159b,44 Fvrbaz me wil begeben

160a,1 Sa daz die corper gar
160a,2 vf die selben zit daz ist war
160a,3 erschienen da den lvden
160a,4 da miede wil vns beduden
160a,5 der glosen meister daz vns got
160a,6 vn- sin vil bitterlicher dot
160a,7 der gri-men helle hat erlost
160a,8 Sin mildekeit hat vns gedrost
160a,9 daz wir gar sicherliche
160a,10 zvo deme hy-melriche
160a,11 Mit warheit kv-men sollen
160a,12 obe wir iz behalden wollen
160a,13 //// Noch me verhorit hvde
160a,14 waz auch vns nvo bedvde
160a,15 daz ammit daz die Cristenheit
160a,16 vf den selben dag begeit
160a,17 // In der kirchen der altar
160a,18 bedudit christum daz ist war
160a,19 Sa bi des altaris gewant
160a,20 Christis ivngeren sin benant
160a,21 //// da krist Jesus der herre zart
160a,22 gefangen von den ivden wart
160a,23 Sine ivngeren von der dro
160a,24 von ieme flvhen alle do
160a,25 daz dudit daz man den altar
160a,26 von aller siner zierde gar
160a,27 daz ist der kirchin haubit
160a,28 enblozit vn- beraubit
160a,29 // Sa man dan daelit an die bret
160a,30 des man da vore niht en det
160a,31 da miede vns auch bedudit ist
160a,32 daz der vil ware h’re krist

160a,33 von der gar leiden ivden braht
160a,34 wart v'spottit durch die naht
160a,35 da sin ir arger wille plag
160a,36 Sie slvogen in vf sinen nag
160a,37 vn- sprachen dan die veigen zagen
160a,38 "wissage wer hat dich geslagen"
160a,39 //// al vf die namelichen zit
160a,40 da die hohzit vffe lit
160a,41 die glocken man nit lvdit
160a,42 da miede ist vns bedudit
160a,43 daz der ware herre krist
160a,44 gefangen . dot . begraben ist

160b,1 vf den dritten dag daz ist kvnt
160b,2 des iach auch der zwelfboden mvnt
160b,3 "gehoffit haden wir daz er
160b,4 gewesen svlde sin auch der
160b,5 der Israhel an allen wan
160b,6 hie erlosit svlde han"
160b,7 // Fvrbaz sa wiszit z ware
160b,8 Zwelf liht vf deme altare
160b,9 die man alda gemeine
160b,10 v'leschit biz vf eine
160b,11 da miede auch vns bedudit ist
160b,12 da der ware herre crist
160b,13 an deme froneCrvce erstarb
160b,14 daz der glaube da verdarb
160b,15 vnde auch die ware minne
160b,16 die der zwelfboden sinne
160b,17 Zvo Christo ir ieglicher drvg
160b,18 da er in auch die fvoze twug
160b,19 vf den grvonen dvnerstag
160b,20 da ir ieglicher sich irwag
160b,21 al zvo der selben vriste
160b,22 zvo sterbene mit Christe
160b,23 des sie ieme abe giengen
160b,24 da in die ivden viengen
160b,25 //// des waren sie v'loschen gar
160b,26 an deme glauben daz ist war
160b,27 Ir keiner da sa stede was
160b,28 alse ich iz in der glosen las
160b,29 der fvllen glavben wolde
160b,30 daz Jesus Christus solde
160b,31 vf von deme dode erstan
160b,32 der glaube was vil gar vergan
160b,33 an in alda gemeine
160b,34 wan an der magit reine
160b,35 die Jesum Christum meit gebar

160b,36 die was ie vollenkv-men gar
160b,37 an deme glauben wisze krist
160b,38 da von auch vns bedudit ist
160b,39 Maria die vil reine meit
160b,40 bi der kerzen die man leit
160b,41 v'borgenliche byrnen da
160b,42 also die magit maria
160b,43 was des glayben frideschilt
160b,44 den glauben sie vil gancz behilt

161a,1 In irme reinen herzen
161a,2 reht alse man an der kerzen
161a,3 die da vil schone burnit
161a,4 die andern liht beginnit
161a,5 enbyrnen die verloschen sin
161a,6 also al vf die druwe min
161a,7 wuorden da an ir zvohtant
161a,8 die zwelfboden da inbrant
161a,9 an deme glauben reine
161a,10 vnde alle die gemeine
161a,11 die da waren zwifelhaft
161a,12 worden an des glauben kraft
161a,13 // da von die reine kristenheit
161a,14 daz heilig ammit nvo begeit
161a,15 vf den samizdag von ir
161a,16 Mit druwelichis herzen gir
161a,17 Salve sancta parens ie
161a,18 Man erit mit der faste auch sie
161a,19 Man sal sie eren daz ist reht
161a,20 Iz si der herre iz si der kneht
161a,21 Iz si die frauwe iz si die meit
161a,22 war vmme . sie hat vns bereit
161a,23 daz wir bi deme glauben sin
161a,24 auch bleben vf die druwe min
161a,25 In die sancto pasce
161a,26 Maria magdalena et maria Iacobi
161a,27 Bi den drien wiben reine
161a,28 solle wir nvo algemeine
161a,29 dri hohe dvogende verstan
161a,30 die wir auch an vns sollen han
161a,31 da miede wir zvo aller frist
161a,32 vnsern h'ren Ihesvm krist
161a,33 geistliche svllen svochen
161a,34 der gnaden sin geruchen
161a,35 alle zit vnde alle fart
161a,36 rehte alse er gesvocht wart
161a,37 Libliche daz si vch erkant
161a,38 von den drin frauwen for genant

161a,39 //// Nvo wolde ich allen lvdn
161a,40 vil gerne hie beduden
161a,41 waz sie sollen hie verstan
161a,42 bi den drin frauwen wol gedan
161a,43 // Maria magdalene
161a,44 bi der sa ist bedudit hie

161b,1 die redeliche wisheit
161b,2 w'liche daz si vch geseit
161b,3 herzelieben brvdere min
161b,4 waz mag grozer wisheit sin
161b,5 wan daz ein mensche nimit war
161b,6 aller siner svnden gar
161b,7 vnde erkennit sich alsa
161b,8 daz iz got auch irzvornit ha
161b,9 //// waz auch vns bedudit si
161b,10 bi marien Iacobi
161b,11 daz wirt vch hie von mir geseit
161b,12 Sie bedudit reinekeit
161b,13 alse ich die glosen han gelesen
161b,14 waz mohte reiner dan wesen
161b,15 wan daz die svndeclichen dat
161b,16 der mensche willecliche lat
161b,17 // Sa maria salome
161b,18 von der vch ist gesaget . e .
161b,19 die bedudit rehtekeit
161b,20 w'liche daz si vch geseit
161b,21 herzelieben kinder fin
161b,22 waz solde vmmer rehter sin
161b,23 wan daz der mensche gode
161b,24 al noch der . e . gebode
161b,25 bvoze sine missedat
161b,26 die auch der lib begangen hat
161b,27 //// die dri reinen wib iesa
161b,28 kauften auch aromatha
161b,29 vf die namelichen vrist
161b,30 daz sie den waren herren krist
161b,31 wolden mit der salben
161b,32 bestrichen allenthalben
161b,33 // Magdalena die gvode
161b,34 Mit ruwelichem mvode
161b,35 vmme eris h'ren werren
161b,36 sa kavfte sie den merren
161b,37 der bitter ist endruwen
161b,38 der merre vns auch den ruwen
161b,39 bedudit . vnde nennit
161b,40 wanne der mensche erkennit
161b,41 Sine grozen missedat

161b,42 die hie der lib begangen hat
161b,43 Sa wird der mensche leidig gar
161b,44 In sime herzen daz ist war

162a,1 Maria Iacobi iesa
162a,2 den aloes auch kaufte da
162a,3 der hat vil grozer bitterkeit
162a,4 w'lichen daz si vch geseit
162a,5 wan der mirre vor genant
162a,6 der aloes vil gvt erkant
162a,7 bedudit vns die bihte gvot
162a,8 die man da ruweliche dvot
162a,9 der mvnt mit warer bihte list
162a,10 der vil vnreinen svnden mist
162a,11 die bihte gar verherit
162a,12 daz herze wirt gekerit
162a,13 auch von der bihte reine
162a,14 von aller svnden meine
162a,15 //// Sa maria Salome
162a,16 die ich vch han genennit . e .
162a,17 in warer minnen laufte
162a,18 den balsamvm da kavfte
162a,19 in der namelichen vrist
162a,20 der balsame allerstrengist ist
162a,21 w'liche daz si vch geseit
162a,22 vor der vil grozen bitterkeit
162a,23 die sin kraft an ieme hat
162a,24 den corper niet ferfvlen lat
162a,25 der balseme wo-necliche gefar
162a,26 bedudit vns die buoze gar
162a,27 daz wiszit algemeine
162a,28 von den drin stucken reine
162a,29 wirt ein salbe gvot irkant
162a,30 Ist penitencia genant
162a,31 welich svnder allenthalben
162a,32 Sich smerit mit der salben
162a,33 des sele mvoz genesen
162a,34 des svlt ir sicher wesen
162a,35 von aller svnden meine
162a,36 al von der salben reine
162a,37 // Mit der selben salben
162a,38 wart auch an allenthalben
162a,39 bestrichen dauid
162a,40 des wart er aller svnden quid
162a,41 //// Mit der selben salben zart
162a,42 petrus auch gesalbit wart
162a,43 des wart er svnden ene
162a,44 // Maria magdalene

162b,1 Mit der salben nit zvo weich
162b,2 allenthalben sich bestreich
162b,3 des ist sie worden reine
162b,4 von aller svnden meine
162b,5 //// die frauwen dri endruwen
162b,6 giengen auch mit ruwen
162b,7 da mit einander abe
162b,8 Sie qvamen zvo deme grabe
162b,9 vnde svochten da den waren krist
162b,10 waz nvo hie bi bedudit ist
162b,11 daz wil ich sagen vch zvohant
162b,12 vier leie lvde sint bekant
162b,13 die svochen got mit eren vil
162b,14 alse ich vch nvo bescheiden wil
162b,15 // die einen svochen in gar frvo
162b,16 alse ich vch wil bescheiden nvo
162b,17 alse auch dede sante Iohan
162b,18 Baptista der vil reine man
162b,19 der svochte en in der kintheit
162b,20 w'liche daz si vch geseit
162b,21 //// die andern alse die svnne
162b,22 vf gat in aller wuonne
162b,23 sa svchent sie den waren krist
162b,24 da bi vns auch bedudit ist
162b,25 daz sie mit aller dugende
162b,26 got svochent in der ivgende
162b,27 daz Iohannes wolde dvon
162b,28 vnsers herren mv-men svon
162b,29 // Sa suchen in die dritten
162b,30 Mit dugentlichen sitten
162b,31 al zvo der selben stvonde
162b,32 Mit herzen vnde mit mvonde
162b,33 daz ist mit warer sage
162b,34 al vor deme mittendage
162b,35 Ich meinen die da waren
162b,36 noch vnder drizig iaren
162b,37 Sam bartholomeus hat gedan
162b,38 der drizig iar auch mohte han
162b,39 da er an godis dienist qvam
162b,40 vnde heilig leben an sich nam
162b,41 //// die vierden zvo der nonezit
162b,42 qvamen alse die glose quit
162b,43 daz ist mit warer sage
162b,44 al noch deme mittemdage

163a,1 vnde svchen auch den waren krist
163a,2 bi der zit vns bedudit ist

163a,3 redelichis aldirs iar
163a,4 alse Petrus daz ist war
163a,5 auch redeliche hade
163a,6 da eme die godis gnade
163a,7 also gar drostliche qvam
163a,8 da er in zvo eime ivngeren nam
163a,9 // die fvnften kv-men spade
163a,10 zvo vnsers herren gnade
163a,11 daz ist al vf des endis zil
163a,12 alse ich vch nvo bescheiden wil
163a,13 alse auch der schachman dede
163a,14 da Christus sine bede
163a,15 v'horte al an des crucis stam
163a,16 vnnde in zvo sinen gnaden nam
163a,17 //// Seht alle die geruochen
163a,18 daz sie so Christum svochen
163a,19 die vindent auch den waren krist
163a,20 der heiler aller svnden ist
163a,21 // Sa diese wib hin abe
163a,22 auch qvamen zvo deme grabe
163a,23 den corper sie nit fvnden
163a,24 den engel zvo den stvnden
163a,25 die frauwen fvnden da mit ein
163a,26 von deme grabe was der stein
163a,27 gewelgit zvo den stvnden
163a,28 daz duoch da in gewonden
163a,29 der lichame cristis was
163a,30 daz fvnden sie da alse ich las
163a,31 //// vil herzenlieben lvde
163a,32 waz hie der engil dvde
163a,33 daz sagen ich vch drade
163a,34 er dudit gotis gnade
163a,35 die auch der mensche findit
163a,36 der sich des vnderwindit
163a,37 daz er auch gode dienen wil
163a,38 deme gibit er grozen gnaden vil
163a,39 // Sa des steinis hertekeit
163a,40 vn- daz grab si vch geseit
163a,41 die bedudent vns vil gar
163a,42 des menschen h'ze daz ist war
163a,43 //// auch svlt ir wiszen daz mit ein
163a,44 der engil welzit dan den stein

163b,1 von deme grabe drade
163b,2 wanne die godis gnade
163b,3 die hertekeit der svnde
163b,4 al vz des herzen grvnde
163b,5 Mit warer bihte zhvit

163b,6 Sa daz daz mensche schvhit
163b,7 Fvorbaz me die missedat
163b,8 da von alsvs geschriben stat
163b,9 “// von vch wil ich enphirren
163b,10 die steinen herzen firren
163b,11 daz ir auch werdit reine
163b,12 vnde aller svnden eine
163b,13 daz vch min minne w’de irkant”
163b,14 also der engil vor genant
163b,15 bewisit vns daz ende
163b,16 die stat mit siner hende
163b,17 die vns ein reiniz herze gar
163b,18 auch bedudit daz ist war
163b,19 //// Sa svdarium daz cleit
163b,20 da der corper in geleit
163b,21 vnsers lieben h’reu was
163b,22 daz kleit bedudit alse ich las
163b,23 daz bedrvbecliche leben
163b,24 daz gvoden lvoden ist gegeben
163b,25 // In dirre w’lede wilde
163b,26 in glicher wis der milde
163b,27 der reine zarte Ihesus
163b,28 zvo en allen sprichit svs
163b,29 “//// nvo wiszit der mir dienen wil
163b,30 beide nvo vnde alle zil
163b,31 vn- der sich wil an mich gelan
163b,32 der sal ein reiniz herze han
163b,33 er sal zvo allen ziden
163b,34 durch minen willen liden
163b,35 bedrubekeit der werlede gar
163b,36 beide stille vnde vffenbar”
163b,37 In octaua pasche
163b,38 Cvm esset sero die illa
163b,39 wolt ir der rede losen
163b,40 sa wil ich vz der glosen
163b,41 vch weiz got sagen hvde
163b,42 waz der cenakel dude
163b,43 //// Cenaculvm daz ist ein bvo
163b,44 des glaubit mir bi miner drvo

164a,1 der mit vil menschlicher list
164a,2 gar hohe da geseczit ist
164a,3 // Iz bedudit vns da bi
164a,4 Ein herze daz da svnden fri
164a,5 Ist . vnde auch wil werden
164a,6 vnde daz da von der erden
164a,7 erhaben in des hy-melis thron
164a,8 Ist . alse die apostolon

164a,9 //// weiz got waren vn- sint
164a,10 da von sa sprach vil lieben kint
164a,11 hie der zwelfboden zvnge
164a,12 “al vnser wandelvnge
164a,13 sal in deme hy-melriche wesen”
164a,14 also han ich von in gelesen
164a,15 // wolt ir v’horen nvo da bi
164a,16 waz auch vns bedudit si
164a,17 bi Christis ivngern reyne
164a,18 daz sage ich vch gemeyne
164a,19 //// Sie bedudent gliche
164a,20 daz wiszit sicherliche
164a,21 die hohen dvgende ane wan
164a,22 die sie vf erden han gedan
164a,23 w’liche daz si vch geseit
164a,24 gehorsam vnde kvoschekeit
164a,25 demvodekeit mit milde
164a,26 vn- aller dvogende bilde
164a,27 // die sie vf erden hant gedragen
164a,28 w’liche nvo wil ich vch sagen
164a,29 daz wir mit dvogenden sollen
164a,30 v’dienen obe wir wollen
164a,31 daz wir alhie vf erden
164a,32 auch cristis ivngern w’den
164a,33 //// die dvore an deme cenacule
164a,34 die auch mit deme obstacule
164a,35 beslozen weren gliche
164a,36 daz wiszit sicherliche
164a,37 beide vzene vnde inne
164a,38 bedudent sie fvnf sinne
164a,39 die iesus da verlvhen hat
164a,40 deme menschen siner hantgedat
164a,41 // die sinne ich vch wil nennen
164a,42 obe ir sie wolt erkennen
164a,43 die fvnf sinne sint genant
164a,44 alse ich vch sagen wil zvohant

164b,1 //// Iz ist auch smacken drehen
164b,2 daz horen vn- daz sehen
164b,3 vnde auch da bi daz grifen
164b,4 den hord vil sicherlichen
164b,5 der mensche sal behalden
164b,6 Mit grozer wisheit walden
164b,7 behalten vn- sliezen
164b,8 daz sie eme it vz fliezen
164b,9 zvo der svnden voppekeit
164b,10 die da auch zvo der hellen dreit .
164b,11 // Sa dvdent vns die ivden

164b,12 der leiden helle ruoden
164b,13 Ich meinen die dvofelichen schar
164b,14 die vnser werke nemen war
164b,15 vil gar an allen enden
164b,16 vf daz sie vns entwenden
164b,17 von dvgentlichen werken
164b,18 dit lat vns alle merken
164b,19 //// Sa daz wir vnser dvore
164b,20 auch wieder vnde fvore
164b,21 besliezen vnser sinne
164b,22 Mit godelicher minne
164b,23 daz der bosen duofele kraft
164b,24 an vns it werde sigehaft
164b,25 // Fvor war ich vch nvo kvnden
164b,26 die ir hvs for den svnden
164b,27 alsus besliezen alle zil
164b,28 Mit besloszen dvoren wil
164b,29 auch vnser herre ihesus
164b,30 zvo en da kv-men in ir hvs
164b,31 //// Ich meinen in irs herzen dvm
164b,32 daz da ist daz cenaculvm
164b,33 von deme ich vch . e . han geseit
164b,34 daz Christe also wol beheit
164b,35 daz er da inne vns wonit miede
164b,36 er sprichit “minen steden friede
164b,37 Mit willen ich vch kvnden”
164b,38 des solle wir den svnden
164b,39 festecliche widerstan
164b,40 wollen wir got bi vns han
164b,41 in libe hie . noch dode dort
164b,42 sa behaldit diese wort
164b,43 // wolt ir nvo wiszen auch da bi
164b,44 waz vns da miede bedudit si

165a,1 daz vnser h're Jesus krist
165a,2 Mit slozhaften dvoren ist
165a,3 zvo den ivngeren sin gegang
165a,4 daz dudit wan wir enstan
165a,5 von dode al vf den lesten dag
165a,6 des niema- vober wesen mag
165a,7 der mensche der da bliben sol
165a,8 Mit gode deme ist harte wol
165a,9 des lib wirt sa behende
165a,10 daz er durch alle wende
165a,11 dvrch stahel . ysen . steine
165a,12 avch ferit algemeine
165a,13 //// weren alle berge ein berg
165a,14 vn- wer er dan ein stahilwerg

165a,15 vn- wer dan noch sa dicke
165a,16 in einem avgenblicke
165a,17 der lip dar duorch doch kerte
165a,18 in irrit keine herte
165a,19 // dit wonder mensche merke
165a,20 Sie in irrit keine sterke
165a,21 die kvorze noch die lenge
165a,22 die wide noch die enge
165a,23 die hohe . dvfe . bloze
165a,24 die cleine noch die groze
165a,25 //// die breide noch die dicke
165a,26 noch keiner hande stricke
165a,27 die crvmme noch die slihte
165a,28 die ferre noch die rihte
165a,29 fravde . drvren . lieb . noch leit
165a,30 da von auch vns die glose seit
165a,31 // der lip noch der vferstende
165a,32 avch wirt sa gar behende
165a,33 gepurit vnde gereinit
165a,34 in gode sa vereinit
165a,35 daz sie an rehter wuonne
165a,36 wirdit clarer dan die svonne
165a,37 //// dit ist des fader wille
165a,38 Svbtill sam ein cintille
165a,39 der ist lip vnde swinde
165a,40 er gat fvor alle winde
165a,41 keiner hande leit noch we
165a,42 Mag en gervoren nv-mer me
165a,43 nieman mag erzvrnen
165a,44 keyn fvr en kan verburnen

165b,1 noch wazzer in erdrenken
165b,2 nieman en kan gedenken
165b,3 daz man den lip ersterben
165b,4 Moge noch verderben
165b,5 er sal dan leben svnder leit
165b,6 Mit gode in siner ewekeit amen
165b,7 Doa scda post pascha
165b,8 Ego svm pastor bonvs
165b,9 nvo wolde ich durch der lvde heil
165b,10 vz der glosen gerne ein deil
165b,11 Reden obe ich kvnde
165b,12 dvorch daz daz folg die svnde
165b,13 zvo allen ziden flvohe
165b,14 vnde sich zvo gode zvohe
165b,15 //// daz ihesus qvit von hy-melrich
165b,16 "ein vil gvt hirte sa bin ich"
165b,17 bi deme worte gvt gedan

165b,18 zwa sache sal man prvoben an
165b,19 // zvo deme ersten daz der herre gvot
165b,20 Sich selben einen hirten dvot
165b,21 //// zvo deme andern male daz er da qvit
165b,22 daz er die lvde zvo aller zit
165b,23 nennit sine schefelin
165b,24 die da auch in gehorsam sin
165b,25 alse er selber sprichit do
165b,26 in deme ewangelio
165b,27 “// Mine schaf vil gvt erkant
165b,28 Mine stimme wol verstant”
165b,29 vnde daz sich krist der heilant
165b,30 einen hirte hat genant
165b,31 Siner reinen schafe gvot
165b,32 duorch dri sache er daz dvot
165b,33 //// der ich vch wil bescheiden
165b,34 daz ist daz er kan weiden
165b,35 wol sine schaf der milde
165b,36 in dirre werlede wilde
165b,37 Mit drier hande spise
165b,38 die ich vch wol bewise
165b,39 // die erste weide vn- auch die nar
165b,40 die er da sinen schafen gar
165b,41 gibit fvor die hvngernot
165b,42 daz ist dit libliche brot
165b,43 da vone sante Iohan
165b,44 Sprichit der vil reine man

166a,1 //// Daz vnser lieber h're nam
166a,2 daz brot alse sinen gnaden zam
166a,3 von einander er iz brach
166a,4 den gesen er dar vber sprach
166a,5 vnde gab iz so der wise
166a,6 den ivngerin sin zvo spise
166a,7 // daz ander brot ich reide
166a,8 die spise vn- auch die weide
166a,9 die er da sinen schafen git
166a,10 hie fvor den hvnger alle zit
166a,11 daz ist die heilige lare gvot
166a,12 da miede er sie spisen dvot
166a,13 die heiligen prediere
166a,14 Mit godelicher lere
166a,15 da von hat gesprochen svs
166a,16 Sanctus matheus
166a,17 “//// Al an deme brode reine
166a,18 daz mensche niet aleine
166a,19 en lebit nit mit warer dat
166a,20 wan von deme worte daz da gat

166a,21 vz vnsers herren mvnde gar
166a,22 daz gibit der sele riche nar”
166a,23 // die dritte weide vn- auch daz brot
166a,24 da miede die schaf auch spisit got
166a,25 daz ist der lobesame
166a,26 gesenete lichame
166a,27 da miede er die spise kan
166a,28 Cristis mvomen svon Iohan
166a,29 Sprichit von deme brode do
166a,30 in deme ewangelio
166a,31 “//// die rechten warheit wiszit
166a,32 Iz si dan daz ir ezzit
166a,33 Fleisz des menschensvonis gvot
166a,34 vnde drinkit auch sin blvot
166a,35 sa in mogit ir kein leben han”
166a,36 wiszit svnder allen wan
166a,37 wen vnser herre Ihesvs
166a,38 Mit sinem fleische spisit svs
166a,39 vn- drenkit mit deme blvode sin
166a,40 die vzerwelten schefelin
166a,41 // noch dirre svozen weide gvot
166a,42 der reyne hirte wol gemvot
166a,43 dribit in sin schafhvs sie
166a,44 daz schafhvs vns bedudit hie

166b,1 daz frone hymmelriche
166b,2 daz in da ewecliche
166b,3 der fader da bereidit hat
166b,4 von dirre gvden lvde dat
166b,5 Sanctus matheus sprichit do
166b,6 in deme ewangelio
166b,7 “//// Ey gvoder kneht gedruwe
166b,8 an gvden dingen nvwe
166b,9 in dinis herren fraude gang
166b,10 wan dir an druwe ie gelang”
166b,11 // Iohan ewangeliste
166b,12 Sprichit sa von kriste
166b,13 “//// nie beszer hirte was noch ist
166b,14 wan der ware h’re krist”
166b,15 durch vns wart he geleczt
166b,16 die sele sin geseczt
166b,17 hat er fvor sine schefelin
166b,18 Ich meine daz er daz leben sin
166b,19 vf gab da an des crvcis stam
166b,20 krist daz osterliche lam
166b,21 niht eine in wolde fehten
166b,22 alhie fvor die gerechten
166b,23 daz er die gode brehte gar

166b,24 er streit fvor aller mvoder bar
166b,25 Sie weren svndig oder gvot
166b,26 vns alle hat irlost sin blvot
166b,27 vf die namelichen stvnd
166b,28 Mit ein erlost er die frvnd
166b,29 er loste auch sine fiende
166b,30 an deme crvce schriende
166b,31 da er den fader fvor sie bat
166b,32 gein sinem fader er vns hat
166b,33 v'svonit gar der gvode
166b,34 Christus mit sinem blvode
166b,35 // nvo prvobit alle drade
166b,36 die vobergrozen gnade
166b,37 die grozen gabe an dirre frist
166b,38 daz vnser herre Ihesvs krist
166b,39 alsus geruchete fehten
166b,40 al fvor die vngerehten
166b,41 //// Fvor die viende ein frvnt
166b,42 der h're fvor den kneht daz ist kvnt
166b,43 got al fvor die lvde hat
166b,44 der schepfer fvr die hantgedat

167a,1 die sele sin vmme vnser leben
167a,2 wolde willecliche geben
167a,3 al von sin selbis willekvr
167a,4 nvo solle wir vns sehen fvr
167a,5 daz wir der grozen gnaden schin
167a,6 von svnden it vnwirdig sin
167a,7 vnde auch der grozen gabe
167a,8 wir mvozen legen abe
167a,9 die svnden gar vf erden
167a,10 solle wir ir wirdig werden
167a,11 aldort in godis throne
167a,12 Sit daz sin selbis sone
167a,13 nit en wolde schonen got
167a,14 er en mvoste ie liden den dot
167a,15 //// Iesa dvn ich vch bekant
167a,16 daz krist die lvde hat genant
167a,17 Sine lieben schefelin
167a,18 gar alle die da gehorsam sin
167a,19 // der gvode mensche sprechen ich
167a,20 deme schafe glichit sich
167a,21 dvorch fvnf leie sache wol
167a,22 der ich vch bescheiden sol
167a,23 //// die erste sache die iz dreit
167a,24 daz ist sin einfaldeckeit
167a,25 da von daz gvde schefelin
167a,26 bekennit wol den hirten sin

167a,27 // die andern sache ir wiszen svolt
167a,28 daz ist werliche die gedult
167a,29 die man die schaf auch sihit dren
167a,30 wie sere daz iz wirt geslen
167a,31 wie vil smerzen im geschit
167a,32 sa in slehit iz doch wieder niht
167a,33 //// die dritte sache ist daz sie sin
167a,34 gehorsam ie die schefelin
167a,35 irme rehten hirte gar
167a,36 vnde gebent irme herren nar
167a,37 an miste . an milche . an wollen
167a,38 alse sie zvo rehte sollen
167a,39 // die fierde ist daz iz schvhit
167a,40 daz schaf den wolf hie flvhit
167a,41 Ich meinen die haubitsvnde gar
167a,42 die auch die sele missefar
167a,43 Machit wont vnde da bi sir
167a,44 daz schaf daz ist ein edel dier

167b,1 daz schefelin gar nvzlich ist
167b,2 Iz brengit wollen vnde mist
167b,3 vnde milch . gut ist sin lon
167b,4 also solle wir auch dvon
167b,5 //// wir svollen haben ruwen
167b,6 den ich zvo minen druwen
167b,7 deme miste vil wol glichen
167b,8 nvo wiszit sicherlichen
167b,9 also der mist hie dvngit
167b,10 die reben vnde irivngit
167b,11 daz sie auch werden berhaft
167b,12 vnde der erden gibit kraft
167b,13 daz sie brengit riche blvot
167b,14 glicher wis der ruwe dvot
167b,15 er dringit in mit smerzen
167b,16 vnde dvngit dvrrer herzen
167b,17 sa daz sie werden berhaft
167b,18 er gibit in soliche kraft
167b,19 daz sie ir svnde weinent
167b,20 vnde sich von svnden reinent
167b,21 // Fvr baz me si vch geseit
167b,22 die milch bedudit reinekeit
167b,23 Ich meine reine kvoschis leben
167b,24 dar in der mensche sich sal geben
167b,25 //// die milch ist auch von nature gar
167b,26 daz wiszit wol snewizgefar
167b,27 die ist aller flecken eine
167b,28 sie ist sa lange reine
167b,29 Sa man sie wiz beheldit

- 167b,30 vnde ir rechtliche weldit
167b,31 // Ey kvosher mensche sa me dvo
167b,32 der sich v'bvnden hat dar zvo
167b,33 daz er kvsliche leben sol
167b,34 vn- deme zimit weiz got wol
167b,35 wil er der w'ke wesen fri
167b,36 sa sal er wesen auch da bi
167b,37 vnkvscher worte entladen
167b,38 die dicke brengint schaden
167b,39 Mit druwen ich daz raden
167b,40 vnde wer da nit des braden
167b,41 ezzen wil noch solle
167b,42 daz der auch nit en wolle
167b,43 Lecken hie des braden spisz
167b,44 Sa blibit er an edewisz
- 168a,1 // die rede ich also meine
168a,2 vnde wer da wolle reine
168a,3 in rehter kvosche bliben
168a,4 an ma-nen vnde an wiben
168a,5 sa mvozen sie ieweder sit
168a,6 vnkvoscher rede wesen qvit
168a,7 wibclaffen affit ma-nis lib
168a,8 die man sa wieder ie die wib
168a,9 Mit claffe in gewinnent
168a,10 daz da w'liche enbrinnet
168a,11 der mi-ne fvor ir beider sin
168a,12 Svs get ir kvschis leben hin
168a,13 //// nvo lat vch sagen follen
168a,14 reht alse man vz der wollen
168a,15 vil gvde dvoch bereidit
168a,16 da miede man becleidit
168a,17 Ivncfrauwen . man . vn- auch die wib
168a,18 vf der erden gar den lib
168a,19 also becleidit gvde dat
168a,20 die der mensche hie begat
168a,21 zvo hy-mele dort die sele
168a,22 Mit sancte michahele
168a,23 Mit aller eren vollen
168a,24 des glichit man die wollen
168a,25 den dugentsamen werken
168a,26 // Nvo wolle vns alle sterken
168a,27 krist von hy-melriche
168a,28 daz wir sa dvgentliche
168a,29 v'enden hie daz leben
168a,30 daz er vns wolle geben
168a,31 daz wir auch sine schefelin
168a,32 ewecliche mvozen sin

168a,33 in frauden ewekeit
168a,34 die da der fader hat bereit
168a,35 Abrahamis samen
168a,36 in godis namen . Amen
168a,37 Domonica tercia post pascha
168a,38 Modicum et iam non videbitis
168a,39 ach kvnde ich nvo endrinnen
168a,40 den sarg dan vz gewinnen
168a,41 den richen schacz der glosen
168a,42 da von sa wolde ich kosen
168a,43 in diesem ewangelio
168a,44 der glosen meister sprichit so

168b,1 daz wir dri sache sollen
168b,2 behalden vnbewollen
168b,3 die sint vns gvt zvo aller frist
168b,4 die erste sache weiz got ist
168b,5 //// daz der hohe werde got
168b,6 nit aleine sinen dot
168b,7 v'kvnte vnde auch sin ende
168b,8 wen auch sin vferstende
168b,9 vnde dar zvo auch sin hy-melfart
168b,10 Christus der hy-melfvrste zart
168b,11 hatte lange vorehin
168b,12 verkvndit sinen ivngerin
168b,13 // daz ander vf die druwe min
168b,14 Ist daz auch die ivngeren sin
168b,15 Christis martelliche not
168b,16 Schrieten . vnde sinen dot
168b,17 daz in der dvgende riche
168b,18 vor sagete werliche
168b,19 "Ir weinit vn- schriet mich
168b,20 die w'lit aber frauwit sich"
168b,21 //// daz dritte ist daz sich frauwete
168b,22 die w'lit da sie schauwete
168b,23 da Jesus die martel leit
168b,24 w'liche daz si vch geseit
168b,25 // vnde da der herre ihesvs
168b,26 Sprach zvo sinen ivngeren svs
168b,27 "wiszit daz gemeine
168b,28 vber eine wile cleine
168b,29 vwer keiner mich gesehen mag"
168b,30 vf den grvonen dunrstag
168b,31 diese wort er zvo in sprach
168b,32 da man en mit in ezzen sach
168b,33 //// Hie mide meinde er sa ich las
168b,34 daz er noch sime dode was
168b,35 begraben an den dritten dag

168b,36 Mit warheit ich daz sprechen mag
168b,37 “die wile en sehit ir niht mich
168b,38 anderwerbe sprechen ich
168b,39 vber eine cleine wile gar
168b,40 sa sehit ir mich aber dar”
168b,41 dit meinde er als ich vch sen
168b,42 daz er auch in den vierzig den
168b,43 noch siner vferstende hie
168b,44 Ien dicke solden sehen sie

169a,1 “vnde dar noch svlt ir sicher sin
169a,2 Sa far ich zvo deme fader min”
169a,3 //// daz Christus der mi-needliche
169a,4 zvo der zit auch libliche
169a,5 zvo dvnne sinen ivngeren plag
169a,6 des pligit er noch allen dag
169a,7 vns zvo dvnne daz ist war
169a,8 Mit geistlichen sachen gar
169a,9 // Ihesus sich da vnder dut
169a,10 vor sinen lieben frvnden gvot
169a,11 daz in ir keinis auge siht
169a,12 vn- aber von ir frvnschaft niht
169a,13 von vil sachen sa ist daz
169a,14 alse ich da in der glosen las
169a,15 daz er sich hie niht lezit sehen
169a,16 der ich ein deil vch wil v’iehen
169a,17 Iz ist daz in kein avge wol
169a,18 Mag sehen noch en sol
169a,19 Fleiszliche daz si vch geseit
169a,20 //// daz ander daz hohfertekeit
169a,21 deme menschen da vone qveme
169a,22 der sinen got v’neme
169a,23 alhie mit der gesiht
169a,24 daz iz auch wende die rihte
169a,25 Iz were von siner wurde gar
169a,26 vn- voberhvbe is sich daz ist war
169a,27 // Got ist hie sinen frvnden bi
169a,28 stedecliche die sich fri
169a,29 von haubitsvnden halden
169a,30 der wil got selber walden
169a,31 //// Got git in notdorft vnde nar
169a,32 Got ni-mit siner frvnde war
169a,33 Got sine frvnt geleidit
169a,34 Got sich von in niet scheidit
169a,35 Got sihit dich dvo siech auch in
169a,36 Sa dich bescheiden wil min sin
169a,37 Mit des glauben augen din
169a,38 Salt dvo den godelichen schin

169a,39 Sehen an zvo aller vrist
169a,40 dvo salt glauben auch daz krist
169a,41 Mensche wart dvrch dine not
169a,42 glaube auch daz er den dot
169a,43 dvorch dich leit vnde ist erstan
169a,44 von deme dode vn- ist gegan

169b,1 vf zvo sime fader wieder
169b,2 vn- der die werlit vmmer sieder
169b,3 Mit sinem vronelichamen wert
169b,4 gespisit hat die sin begert
169b,5 dar zvo gedrenkit auch sin bluot
169b,6 vnde noch dagelichis dvot
169b,7 // dvo salt des festen glauben han
169b,8 daz krist her nieder kv-mit dan
169b,9 al vf des lesten dagis mal
169b,10 Sa hie die w'lit enden sal
169b,11 Sa sal er vrteil sprechen geben
169b,12 gar vber alle die da leben
169b,13 vnde die auch da erstvrben ie
169b,14 dit siech mit deme glauben hie
169b,15 sa sihist dvo den waren krist
169b,16 der svon des waren fader ist
169b,17 in des hy-melrichis thron
169b,18 vnde der da ist der gvoden lon
169b,19 von angesiht zvo angesiht
169b,20 da an in ist kein zwifel niht
169b,21 //// Fvrbaz wiszit lieben kint
169b,22 waz heiliger lvde vf erden sint
169b,23 die schrient nvo vn- alle vrist
169b,24 Sie wiszent daz geschriben ist
169b,25 "Selig sa sint alle die
169b,26 die vf der erden weinent hie
169b,27 dvorch die not der kristenheit"
169b,28 iedoch sa si vch daz geseit
169b,29 daz die einen drahene sin
169b,30 gar bitter bi den druwen min
169b,31 die hie der mensche gvzit
169b,32 vnde sa daz wazzer flvzit
169b,33 al vz des herzen grvnde
169b,34 da fvor sin selbis svnde
169b,35 // die andern drehene gode weiz
169b,36 die sint auch bitter vnde heiz
169b,37 alse ich vch wil sagen wie
169b,38 die der mensche gvzit hie
169b,39 Mit druweclichen listen
169b,40 fvor sinen ebencristen
169b,41 //// die dritten drehene liben kint

169b,42 heiz vnde da bi svoze sint
169b,43 die daz mensche mit beger
169b,44 gvzit durch der augen wer

170a,1 Mit druwen innecliche
170a,2 dar vmme daz hy-melriche
170a,3 // daz ist daz faderliche lant
170a,4 daz got deme menschen hat benant
170a,5 //// daz ihesus sprach “v’nemit mich
170a,6 von mime dode frauwit sich
170a,7 die w’lit svnder allen wan”
170a,8 da bi sa svollit ir verstan
170a,9 alle die die werlit gar
170a,10 von herzen minnent daz ist war
170a,11 ir fraude doch zvo aller frist
170a,12 vnstede wankelmvodic ist
170a,13 Mit gallen vndermischit
170a,14 ir fravde gar verlischt
170a,15 von drvrekeit von zorne
170a,16 fro hvde . drvrig morne
170a,17 ir fraude ist gar leschlich
170a,18 dar in sa hat gemischit sich
170a,19 hvnger . kvmmer vnde not
170a,20 zvo ivngist ni-met sie der dot
170a,21 der fraude vf erden nie geliz
170a,22 daz stat da in prov’bijs
170a,23 “der lvde schimpf ir zierde
170a,24 dar in sich mischt sirde
170a,25 a m ende sie versindert
170a,26 ir fraude weinen hindert”
170a,27 // nvo wolle vns allen helfen krist
170a,28 der alles lebens leben ist
170a,29 daz wir v’dienen mvozen hie
170a,30 die fraude die da nie zvorgie
170a,31 in deme krancken libe schwach
170a,32 daz wir kv-men svnder ach
170a,33 in daz faderliche lant
170a,34 daz got da selber hat benant
170a,35 e . abrahamis samen
170a,36 in godis namen amen
170a,37 Domonica quarta pus pascha
170a,38 Uado ad eum qvi misit me
170a,39 her vf der glosen meist’ qvit
170a,40 da iz was kv-men an die zit
170a,41 daz Jesus sterben wolde
170a,42 vmme vnser aller scholde
170a,43 da miede er vns erlost
170a,44 die ivngeren sin er droste

170b,1 /// Iz was ir allerbeste
170b,2 drost . vnde auch der leste
170b,3 da in da seit der here
170b,4 von der vil grozen ere
170b,5 Siner hy-melischen fart
170b,6 da krist zvo sinen ivngeren zart
170b,7 sprach . “vnde ich sal gen zvoant
170b,8 zvo deme der mich hat gesant”
170b,9 // Gar drvrig ein gesinde wert
170b,10 daz sines herren da enbirt
170b,11 vn- sin mvoz beiden vnde sol
170b,12 der . em ie da von herze wol
170b,13 vnde druweliche hat gedan
170b,14 von deme sie nvocz vnde ere han
170b,15 /// dar vmme ist daz kein wonder
170b,16 daz die zwelfboden svnder
170b,17 bedrvobit wart ir aller sin
170b,18 da got ir herre fvr von in
170b,19 durch des liebe sie daz ist war
170b,20 alle ding begaben gar
170b,21 // also auch matheus . sprichit do
170b,22 in deme ewangelio
170b,23 “alle ding wir herre han
170b,24 dvorch den willen din verlan”
170b,25 duorch daz auch sie gedroste crist
170b,26 des iach er zvo der selben vrist
170b,27 zvo den zwelfboden vngemeit
170b,28 “Ich sagen vch die warheit
170b,29 Iz fvogit vch waz wolt ir me
170b,30 daz ich zvo minem fader ge
170b,31 al zvo der namelichen zit
170b,32 wan vwer nvocz dar ane lit”
170b,33 /// Alse er spreche “wiszit gar
170b,34 Ist iz daz ich niht en far
170b,35 wieder zvo deme fader min
170b,36 daz mvoz auch vwer schade sin
170b,37 // Sa en kv-mit der paraclitus
170b,38 niht in vwer herzen hvs
170b,39 der gar von siner grozen list
170b,40 ein droster heizit da . vn- ist”
170b,41 /// Nvo mohte simelicher sin
170b,42 Fragen auch durch waz er in
170b,43 den zwelfboden gvot irkant
170b,44 den heiligen geist alda zvoant

171a,1 Niht gebe den er in gehiez
171a,2 // Ich sagen vch duorch waz er iz liez

171a,3 die zwelfboden vnbereit
171a,4 waren daz si vch geseit
171a,5 alle gar vnde ir genoz
171a,6 al zvo der selben gnaden groz
171a,7 daz in die wuorde da sa frvo
171a,8 Sie dorften daz sie sich dar zvo
171a,9 bereiten doch vil gvoder vrist
171a,10 wan sie den waren krist
171a,11 da allesamit gliche
171a,12 in minneten libliche
171a,13 vil me dan geistliche gar
171a,14 waz die lvde daz ist war
171a,15 gesihtliche sehent hie
171a,16 daz hant auch ferre lieber sie
171a,17 wan daz man niht gesehen kan
171a,18 da in zwifele nieman an
171a,19 //// dar vmme david
171a,20 von vnsers h'ren schone qvid
171a,21 "fvor aller lvde sone
171a,22 sa ist ein forme schone"
171a,23 // daz sal wiszen vwer sin
171a,24 sa lange sa die ivngerin
171a,25 an kristen sich besinneten
171a,26 vnde an deme fleische minneten
171a,27 sa gar sere . vnde allermeist
171a,28 sa in wart in nit der heilige geist
171a,29 //// Gibit got dar vmme dir
171a,30 den heiligen geist daz sage mir
171a,31 duorch daz dvo in minnist alle stvnt
171a,32 zvorgenglich gvt vnde dine frvnt
171a,33 reht alse er spreche "nein er nit"
171a,34 got in deme ewangelio qvit
171a,35 "// glaubit . iz ist sicherlich
171a,36 wer da lieber hat dan mich
171a,37 vater . mvoder . oder kint
171a,38 daz min die gar vnwardig sint"
171a,39 //// dit prvobe nim in dinen sin
171a,40 dvo en wollist dich dan vzerin
171a,41 vil gar fleiszlicher liebe leist
171a,42 sa en mag auch dir d' heilige geist
171a,43 Mit siner gnade vf erden
171a,44 avch nv-mer m'e werden

171b,1 daz vns wol die zwelfboden gar
171b,2 hant bewisit vffenbar
171b,3 // wer wil sagen nvo hie bi
171b,4 wer dirre groze fvrste si
171b,5 der zvo deme fader groz gedan

171b,6 vf zvo hi-mel ist gegān
171b,7 //// wer seit iz vns daz wil ich dvon
171b,8 Iz ist der ware godissvon
171b,9 den maria meit inphieng
171b,10 zvo sinem fader er da gieng
171b,11 // Ey lieben kinder gvt gedān
171b,12 von wa-nen sa ist er gegān
171b,13 von der werlde sa gieng er
171b,14 des wil ich wesen vwer wer
171b,15 Crist der hy-melfvorste zart
171b,16 der get da vf noch siner art
171b,17 //// wa gieng er hien der fvorste groz
171b,18 wieder in des fader schoz
171b,19 von da-nen er her nieder qvam
171b,20 da er die menscheit an sich nam
171b,21 die er gab durch vns in den dot
171b,22 da vone hat gesprochen got
171b,23 “// von minem fader ich vz gie
171b,24 in die krancken werlit hie
171b,25 vnde nam an mich die menscheit
171b,26 werliche daz si vch geseit
171b,27 //// anderweit han ich verlan
171b,28 die werlit vnde bin gegān
171b,29 vof zvo minem fader wieder
171b,30 der mich da in die w’lit nieder
171b,31 sante durch des me-schen not”
171b,32 nvo hat gedān der ware got
171b,33 der hy-melische fader gvot
171b,34 alse ein vil wiser kvonig dut
171b,35 des h’schaft kreftecliche stat
171b,36 vn- doch vil starker viende hat
171b,37 die im vil arges wollen dvon
171b,38 gein den er sinen frv-men svon
171b,39 Sendit hien zvo stride dar
171b,40 sa er die vientlichen schar
171b,41 erfihtit daz sie ligit nieder
171b,42 sa kerit er zvo lande wieder
171b,43 // waz mag d’ fad’ da-ne dvon
171b,44 Mit groze- ere- sine- svon

172a,1 vnde mit grozen frauden dan
172a,2 enphehit in der wise man
172a,3 //// Svs dede got der fader sint
172a,4 da er sin eingeborniz kint
172a,5 daz er vil starg erkante
172a,6 von hy-melriche sante
172a,7 Mitten in die werlit gar
172a,8 gein der vil dvofelichen schar

172a,9 Mit der striden wolde auch er
172a,10 krist sazte sich mit starker wer
172a,11 Fvor alliz menslich kvnne
172a,12 daz er en an gewonne
172a,13 die menscheit gar gedroste
172a,14 von siner hant irloste
172a,15 dit wolde er willecliche dvon
172a,16 krist alse ein gedruwer svon
172a,17 den leiden dvofel voberstreit
172a,18 an liplichiz wapencleit
172a,19 // krist geistlich wapen drvog
172a,20 Mit deme crvce krist erslvog
172a,21 daz geistliche wapen sint
172a,22 den hellefvrsten vn- ir kint
172a,23 //// Crist ein enig iar nit leit
172a,24 hie fvor den menschen arbeit
172a,25 er leit iz drvo vn- drizig iar
172a,26 stilleliche vnde vffenbar
172a,27 dvorch den menschen sine- kneht
172a,28 // nvo was iz billich vn- reht
172a,29 daz er noch also grozer swer
172a,30 die erlieden hatte auch er
172a,31 zvo hy-mel fvore wiszit daz
172a,32 von da-nen er bekv-men was
172a,33 vn- da mit ruowe stede
172a,34 noch arbeit fraude hede
172a,35 sam einis grozen fvorsten svon
172a,36 dit wond' wolde er alliz dvon
172a,37 noch siner frien willekvr
172a,38 dar v-me auch er zvo hi-mel fvor
172a,39 al zvo der ewekeide
172a,40 daz er vns da bereite
172a,41 Mit fravde- stvl vn- da bi stat
172a,42 alse er gesprochen hat
172a,43 in deme ewangelio
172a,44 spricht er w'liche also

172b,1 "Ich wil gan mit warheiden
172b,2 vch wil ich auch bereiden
172b,3 eine sicherliche stat"
172b,4 nvo hilf vns hohe trinitat
172b,5 daz wir vns so bereiden
172b,6 sa wir von hinnen scheiden
172b,7 daz wir in dime riche
172b,8 auch bliben ewecliche amen